



ТӨРИЙН МЭДЭЭЛЭЛ

№ 2 (575)

МОНГОЛ УЛСЫН ХУУЛЬ

- *Хэлэлцээр соёрхон батлах тухай*
- *Санхүүгийн протокол, зээлийн гэрээ соёрхон батлах тухай*

МОНГОЛ УЛСЫН ИХ ХУРЛЫН ТОГТООЛ

- *Төрийн албаны зөвлөлийн дарга, орон тооны гишүүдийг томилох тухай*
- *Олон нийтийн радио, Телевизийн Үндэсний зөвлөлийн гишүүнээс чөлөөлөх, гишүүнээр томилох тухай*

МОНГОЛ УЛСЫН ЗАСГИЙН ГАЗРЫН ТОГТООЛ

- *Хөрөнгө оруулалтын гэрээний тухай*

Улсын Их Хурлын Тамгын газар

Улаанбаатар хот

2009 он



ТӨРИЙН МЭДЭЭЛЭЛ

МОНГОЛ УЛСЫН ИХ ХУРЛЫН АЛБАН МЭДЭЭЛЭЛ
Долгоо хоног тутмын

Улаанбаатар хот

2009 оны нэгдүгээр сарын 13

№2 (575)

Гарчиг

Нэг. МОНГОЛ УЛСЫН ХУУЛЬ

11.	Хэлэлцээр соёрхон батлах тухай		17
12.	Хэлэлцээр соёрхон батлах тухай		18
13.	Санхүүгийн протокол, зээлийн гэрээ соёрхон батлах тухай		18
14.	Санхүүгийн протокол, зээлийн гэрээ соёрхон батлах тухай		18

Хоёр. МОНГОЛ УЛСЫН ИХ ХУРЛЫН ТОГТООЛ

15.	Төрийн албаны зөвлөлийн дарга, орон тооны гишүүдийг үүрэгт ажлаас чөлөөлөх тухай	Дугаар 46	18
16.	Төрийн албаны зөвлөлийн дарга, орон тооны гишүүдийг томилох тухай	Дугаар 47	19
17.	Олон нийтийн радио, телевизийн Үндэсний зөвлөлийн гишүүнээс чөлөөлөх, гишүүнээр томилох тухай	Дугаар 48	19
18.	Байнгын хорооны бүрэлдэхүүнд өөрчлөлт оруулах тухай	Дугаар 49	19
19.	Дэд хорооны бүрэлдэхүүнд өөрчлөлт оруулах тухай	Дугаар 50	20

Гурав. МОНГОЛ УЛСЫН ЕРӨНХИЙЛӨГЧИЙН ЗАРЛИГ

20.	Зарим хүнийг одон, медалиар шагнах тухай	Дугаар 383	20
-----	--	------------	----

Дөрөв. МОНГОЛ УЛСЫН ЗАСГИЙН ГАЗРЫН ТОГТООЛ

21.	Журам батлах тухай	Дугаар 49	25
22.	Төрийн болон орон нутгийн өмчийн талаар авч хэрэгжүүлэх зарим арга хэмжээний тухай	Дугаар 50	29
23.	Хөрөнгө оруулалтын гэрээний тухай	Дугаар 51	30
24.	Журам батлах тухай	Дугаар 58	31
25.	Засгийн газрын тохируулагч, хэрэгжүүлэгч агентлаг байгуулах тухай	Дугаар 64	33

МОНГОЛ УЛСЫН ХУУЛЬ

2008 оны 12 дугаар сарын 31-ний өдөр

Улаанбаатар хот

ХЭЛЭЛЦЭЭР СОЁРХОН БАТЛАХ ТУХАЙ

1 дүгээр зүйл. Монгол Улсын Засгийн газар, Дэлхийн банкны Олон улсын хөгжлийн ассоциацийн доронд байгуулсан "Уул уурхайн салбарын институцийг бэхжүүлэх техникийн туслалцааны

төсөл"-ийн санхүүжилтийн хэлэлцээрийг Засгийн газрын өргөн мэдүүлснээр соёрхон баталсугай.

МОНГОЛ УЛСЫН
ИХ ХУРЛЫН ДАРГА

Д.ДЭМБЭРЭЛ

МОНГОЛ УЛСЫН ХУУЛЬ

2008 оны 12 дугаар сарын 31-ний өдөр

Улаанбаатар хот

ХЭЛЭЛЦЭЭР СОЁРХОН БАТЛАХ ТУХАЙ

1 дүгээр зүйл. Монгол Улсын Засгийн газар, Дэлхийн банкны Олон улсын хөгжлийн ассоциацийн хооронд байгуулсан "Хууль зүйн салбарын үйлчилгээг боловсронгуй болгох төсөл"-ийн санхүүжилтийн хэлэлцээрийг

Засгийн газрын өргөн мэдүүлснээр соёрхон баталсугай.

МОНГОЛ УЛСЫН
ИХ ХУРЛЫН ДАРГА

Д.ДЭМБЭРЭЛ

МОНГОЛ УЛСЫН ХУУЛЬ

2008 оны 12 дугаар сарын 31-ний өдөр

Улаанбаатар хот

САНХҮҮГИЙН ПРОТОКОЛ, ЗЭЭЛИЙН ГЭРЭЭ СОЁРХОН БАТЛАХ ТУХАЙ

1 дүгээр зүйл. Улаанбаатар хотын агаарын чанарыг хянах сүлжээ байгуулах төслийн талаар Монгол Улсын Засгийн газар, Бүгд Найрамдах Франц Улсын Засгийн газар хооронд байгуулсан санхүүгийн протокол,

зээлийн гэрээг Засгийн газрын өргөн мэдүүлснээр соёрхон баталсугай.

МОНГОЛ УЛСЫН
ИХ ХУРЛЫН ДАРГА

Д.ДЭМБЭРЭЛ

МОНГОЛ УЛСЫН ХУУЛЬ

2008 оны 12 дугаар сарын 31-ний өдөр

Улаанбаатар хот

САНХҮҮГИЙН ПРОТОКОЛ, ЗЭЭЛИЙН ГЭРЭЭ СОЁРХОН БАТЛАХ ТУХАЙ

1 дүгээр зүйл. Эрдэнэт хотын бохир ус цэвэрлэх байгууламжийн өргөтгөлийн төслийн талаар Монгол Улсын Засгийн газар, Бүгд Найрамдах Франц Улсын Засгийн газар хооронд байгуулсан санхүүгийн протокол, зээлийн гэрээг

Засгийн газрын өргөн мэдүүлснээр соёрхон баталсугай.

МОНГОЛ УЛСЫН
ИХ ХУРЛЫН ДАРГА

Д.ДЭМБЭРЭЛ

МОНГОЛ УЛСЫН ИХ ХУРЛЫН ТОГТООЛ

2008 оны 12 дугаар сарын 31-ний өдөр

Дугаар 46

Улаанбаатар хот

Төрийн албаны зөвлөлийн дарга, орон тооны гишүүдийг үүрэгт ажлаас чөлөөлөх тухай

Төрийн албаны тухай хуулийн 34 дүгээр зүйлийн 34.5, 34.7 дахь хэсэг, Монгол Улсын Их Хурлын чуулганы хуралдааны дэгийн тухай хуулийн 45 дугаар зүйлийн 45.2 дахь хэсгийг үндэслэн Монгол Улсын Их Хурлаас ТОГТООХ нь:

1. Жамбын Норовсамбууг Төрийн албаны зөвлөлийн даргын үүрэгт ажлаас, Багаажавын Өнөбаатар, Намжилдоогийн Чадраабал нарыг орон

тооны гишүүний үүрэгт ажлаас тус тус чөлөөлсүгэй.

2. Энэ тогтоолыг батлагдсан өдрөөс нь буюу 2008 оны 12 дугаар сарын 31-ний өдрөөс эхлэн дагаж мөрдсүгэй.

МОНГОЛ УЛСЫН
ИХ ХУРЛЫН ДАРГА

Д.ДЭМБЭРЭЛ



МОНГОЛ УЛСЫН ИХ ХУРЛЫН ТОГТООЛ

2008 оны 12 дугаар сарын 31-ний өдөр

Дугаар 47

Улаанбаатар хот

Төрийн албаны зөвлөлийн дарга, орон тооны гишүүдийг томилох тухай

Төрийн албаны тухай хуулийн 34 дүгээр зүйлийн 34.4, 34.5, 34.6, 34.7 дахь хэсэг, Монгол Улсын Их Хурлын чуулганы хуралдааны дэгийн тухай хуулийн 45 дугаар зүйлийн 45.2 дахь хэсгийг үндэслэн Монгол Улсын Их Хурлаас ТОГТООХ нь:

1. Төрийн албаны зөвлөлийн даргаар Дорждамбын Зүмбэрэлхамыг, орон тооны

гишүүнээр Дашбалын Батбаяр, Багаажавын Өнөбаатар нарыг тус тус томилсугай.

2. Энэ тогтоолыг батлагдсан өдрөөс нь буюу 2008 оны 12 дугаар сарын 31-ний өдрөөс эхлэн дагаж мөрдсүгэй.

МОНГОЛ УЛСЫН ИХ ХУРЛЫН ДАРГА

Д.ДЭМБЭРЭЛ

МОНГОЛ УЛСЫН ИХ ХУРЛЫН ТОГТООЛ

2008 оны 12 дугаар сарын 31-ний өдөр

Дугаар 48

Улаанбаатар хот

Олон нийтийн радио, телевизийн Үндэсний зөвлөлийн гишүүнээс чөлөөлөх, гишүүнээр томилох тухай

Олон нийтийн радио, телевизийн тухай хуулийн 21 дүгээр зүйлийн 21.8, 21.10, 22 дугаар зүйлийн 22.2 дахь хэсгийг үндэслэн Монгол Улсын Их Хурлаас ТОГТООХ нь:

1. Олон нийтийн радио, телевизийн Үндэсний зөвлөлийн гишүүнээс Раднаагийн Бурмаа, Лувсансүрэнгийн Дамдинсүрэн, Цэдэндоржийн Дашдондов, Жүрмэдийн Занаа, Найдансүрэнгийн Золжаргал, Ганхүүгийн Пүрэвбат, Раднаагийн Хадбаатар нарыг тус тус чөлөөлсүгэй.

2. Олон нийтийн радио, телевизийн Үндэсний зөвлөлийн гишүүнээр Баасанжавын Ганболд, Дамбын Гантөмөр, Цэрэнпилийн Гомбосүрэн, Чойжилжавын Дамбажав, Цэрэнчимэдийн Зоригтбаатар, Сүрэнгийн Цэрэндорж нарыг тус тус томилсугай.

3. Энэ тогтоолыг 2008 оны 12 дугаар сарын 31-ний өдрөөс эхлэн дагаж мөрдсүгэй.

МОНГОЛ УЛСЫН ИХ ХУРЛЫН ДАРГА

Д.ДЭМБЭРЭЛ

МОНГОЛ УЛСЫН ИХ ХУРЛЫН ТОГТООЛ

2008 оны 12 дугаар сарын 31-ний өдөр

Дугаар 49

Улаанбаатар хот

Байнгын хорооны бүрэлдэхүүнд өөрчлөлт оруулах тухай

Монгол Улсын Их Хурлын тухай хуулийн 7 дугаар зүйлийн 7.1.7 дахь заалт, Монгол Улсын Их Хурлын чуулганы хуралдааны дэгийн тухай хуулийн 14 дүгээр зүйлийн 14.3 дахь хэсэг, Улсын Их Хурал дахь МАХН-ын бүлэг, Ардчилсан намын бүлгийн аналгыг үндэслэн Монгол Улсын Их Хурлаас ТОГТООХ нь:

1. Улсын Их Хурлын гишүүн Энэбишийн Лөнх-Очирыг Хууль зүйн байнгын хорооны бүрэлдэхүүнээс чөлөөлж, Төрийн байгуулалтын байнгын хорооны, Улсын Их Хурлын гишүүн Түрэвийн Алтангэрэлийг Аюулгүй байдал, гадаад явдал, иргэдийн байнгын хорооны бүрэлдэхүүнээс чөлөөлж, Нийгмийн бодлого, боловсрол, соёл, шинжлэх ухааны байнгын хорооны, Улсын Их

Хурлын гишүүн Ламжавын Гүндалайг Төрийн байгуулалтын байнгын хорооны бүрэлдэхүүнээс чөлөөлж, Нийгмийн бодлого, боловсрол, соёл, шинжлэх ухааны байнгын хорооны, Улсын Их Хурлын гишүүн Самбуугийн Ламбааг Нийгмийн бодлого, боловсрол, соёл, шинжлэх ухааны байнгын хорооны бүрэлдэхүүнээс чөлөөлж, Төрийн байгуулалтын байнгын хорооны гишүүнээр тус тус баталсугай.

2. Энэ тогтоолыг батлагдсан өдрөөс нь буюу 2008 оны 12 дугаар сарын 31-ний өдрөөс эхлэн дагаж мөрдсүгэй.

МОНГОЛ УЛСЫН ИХ ХУРЛЫН ДАРГА

Д.ДЭМБЭРЭЛ



МОНГОЛ УЛСЫН ИХ ХУРЛЫН ТОГТООЛ

2008 оны 12 дугаар сарын 31-ний өдөр

Дугаар 50

Улаанбаатар хот

Дэд хорооны бүрэлдэхүүнд өөрчлөлт оруулах тухай

Монгол Улсын Их Хурлын тухай хуулийн 24 дүгээр зүйлийн 24.8 дахь хэсгийг үндэслэн Монгол Улсын Их Хурлаас ТОГТООХ нь:

1. Улсын Их Хурлын гишүүн Ламжавын Гүндалайг Ёс зүйн дэд хорооны, Улсын Их Хурлын гишүүн Энэбишийн Мөнх-Очирыг Хүний эрхийн дэд хорооны, Улсын Их Хурлын гишүүн Самбуугийн Ламбааг Мянганы хөгжлийн зорилтууд болон

ядуурлыг бууруулах асуудлын дэд хорооны бүрэлдэхүүнээс тус тус чөлөөлсүгэй.

2. Энэ тогтоолыг батлагдсан өдрөөс нь буюу 2008 оны 12 дугаар сарын 31-ний өдрөөс эхлэн дагаж мөрдсүгэй.

МОНГОЛ УЛСЫН ИХ ХУРЛЫН ДАРГА

Д.ДЭМБЭРЭЛ

МОНГОЛ УЛСЫН ЕРӨНХИЙЛӨГЧИЙН ЗАРЛИГ

2008 оны 12 дугаар сарын 26-ны өдөр

Дугаар 383

Улаанбаатар хот

Зарим хүнийг одон, медалиар шагнах тухай

Үйлдвэрлэл, худалдаа, боловсрол, эрүүл мэнд, эрчим хүч, хөдөө аж ахуй, шуудан холбоо, хэвлэл мэдээлэл, батлан хамгаалах, онцгой байдал, усны аж ахуйн салбар, төр

захиргааны болон төрийн бус байгууллагад олон жил санаачилга, үр бүтээлтэй ажиллаж байгаа дор дурдсан хүмүүсийг одон, медалиар шагнасуугай.

СҮХБААТАРЫН ОДОНГООР:

Гончигийн Балдандорж - Монгол Улсын Засгийн газрын хэрэгжүүлэгч "МОНЦАМЭ" агентлагийн Ахмадын хорооны дарга

ХӨДӨЛМӨРИЙН ГАВЪЯАНЫ УЛААН ТУГИЙН ОДОНГООР:

1. БаттулгынБат-Эрдэнэ - Нийслэлийн Сүхбаатар дүүргийн Засаг даргын Тамгын газрын дарга

2. Хасбазарын Бэхбат - Монгол Улсаас АНУ-д суугаа Онц бөгөөд Бүрэн эрхт Элчин сайд

3. Товчингийн Дашзэвгэ "Монголын хараагүйчүүдийн үндэсний холбоо" ТББ-ын гишүүн, худалдаа үйлчилгээний "Хангайн буянт" ХХК-ийн захирал

4. Жанцангийн Довдон - Говь-Алтай аймгийн усны аж ахуйн "Ус-Алтай" ХК-ийн жолооч

5. НоровынДоржсүрэн - Төр, засгийн Үйлчилгээ, аж ахуйг эрхлэх газрын хангамжийн мэргэжилтэн

6. ЖанчивдоржийнЛомбо -Гадаад харилцааны яамны зөвлөх

7. Шонхорын Мөнхбат - Төв аймгийн Эрдэнэсант сумын дунд сургуулийн зөвлөх багш

8. Сүхрагчаагийн Мөнхтөр - Нийслэлийн Сүхбаатар дүүргийн Засаг даргын Тамгын газрын Төрийн сангийн хэлтсийн дарга

9. Довчингийн Мягмар - Стратегийн судалгааны хүрээлэнгийн захирал

10. Жамъяндоржийн Нэргүй - УИХ-ын Тамгын газрын Хэвлэл, мэдээллийн албаны дарга

11. ЛувсанзундуйнНям - Биеийн тамир, спортын улсын хорооны Эрдэм шинжилгээ, сургалтын төвийн эрдэмтэн нарийн бичгийн дарга

12. Баатарын Одсүрэн - СУИС-ийн хөгжмийн онолын тэнхимийн багш

13. Луузангийн Өлзийсүрэн - Дархан-Уул аймгийн "Дархан-Өлзий" авто сургуулийн захирал

14. Ширчингийн Содном - МУИС-ийн Нийгмийн шинжлэх ухааны сургуулийн захирал

15. Артхүүгийн Сосорбурам - Завхан аймгийн "Баялаг" ХК-ийн хүнсний технологич

16. Дарьсүрэнгийн Сүхбаатар - Нүүдлийн соёл иргэншлийг судлах олон улсын нийгэмлэгийн ерөнхийлөгч

17. Чүлтэмийн Цэрэнжав - Дархан-Уул аймгийн "Энх-Ачтан" хүүхдийн эмнэлгийн эмч

18. Норпилын Чагнаа - Усны институтийн зөвлөх инженер

19. Даваагийн Энхээ - УБТЗ-ын "Замчин" спорт клубийн мэргэжилтэн



"АЛТАНГАДАС" ОДОНГООР:

1. Дүүрэнбатын Алтангэрэл - Улсын Их Хурлын Тамгын газрын зохион байгуулагч
2. Дэмбэрэлийн Алтанхүү - Дархан-Уул аймгийн Дархан сумын иргэн, ахмад багш
3. Дагважанцангийн Алтанцэцэг - Нийслэлийн Татварын газрын татварын улсын байцаагч
4. Чулууны Алтанцэцэг - Сангийн яамны Төрийн сангийн ахлах мэргэжилтэн
5. Дорлигжавын Баасан - "Номыг тэтгэгч сүм" шашины байгууллагын тэргүүн
6. Гомбосүрэнгийн Баатар - Иргэний бүртгэл мэдээллийн улсын төвийн хуулийн зөвлөх
7. Билалын Бабахан - Ховд аймгийн Буянт сумын Засаг даргын Тамгын газрын татварын улсын байцаагч
8. Дамдингийн Бадарч - Хөгжим бүжгийн коллежийн дэд захирал
9. Цэндийн Бадрах - Усны хэрэг эрхлэх газрын дарга
10. Цагаанхүүгийн Балжинням - Увс аймгийн Зүүнхангай сумын малчин
11. ЧулууныБатбаатар - Сангийн яамны Төсвийн бодлого зохицуулалтын газрын ахлах мэргэжилтэн
12. ЦэвээнийБатдэмбэрэл - Нийслэлийн Баянгол дүүргийн Иргэний бүртгэл, мэдээллийн тасгийн дарга
13. Найдангийн Батмөнх - "Монголын анчдын нийгэмлэг" төрийн бус байгууллагын мэргэжилтэн
14. Цагаачийн Бат-Өлзий - ШУТИС-ийн харъяа Дулааны төвийн экологийн хүрээлэнгийн эрдэмтэн нарийн бичгийн дарга
15. Дарамрагчаагийн Батсүх - Ашигт малтмал, газрын тосны Хэрэг эрхлэх газрын ахлах мэргэжилтэн
16. Батаахүүгийн Баянжаргал - Нийслэлийн Засаг даргын Тамгын газрын Хотын хөгжлийн бодлогын хэлтсийн дарга
17. Магваны Болд - Хас банкны ерөнхий захирал
18. Лувсандамдингийн Бямбасүрэн - Нийслэлийн Засаг даргын Тамгын газрын Хотын хөгжлийн бодлогын хэлтсийн ахлах мэргэжилтэн
19. Лувсангийн Ванчиг - Завхан аймгийн Усны аж ахуйн "Тэсийн бүрд" ХХК-ийн жолооч
20. Балжирын Вая - Геоэкологийн хүрээлэнгийн төсөвчин
21. Дамдинсүрэнгийн Ганзориг - Төв аймгийн "Төв-Ус" ХК-ийн захирал
22. Дагвацэрэнгийн Гомбо - "Монголын барилгачдын үйлдвэрчний эвлэлийн хороо" төрийн бус байгууллагын дарга
23. Сундуйн Гонгон - Увс аймгийн Улаангом сумын өндөр настан, ахмад багш
24. Агваандарамын Гурбадам - ЭМШУИС-ийн оюутны албаны декан
25. Дашийн Дагиймаа - Хадгаламж банкны тооцооны 14 дүгээр төвийн захирал
26. ЖамъяныДалай - Нийслэлийн усны аж ахуйн "Престиж инженеринг" ХХК-ийн ерөнхий захирал
27. ПунцагхоролынДамбий - Орхон аймгийн усны аж ахуйн "Бүрхаш" бүрэн бус нөхөрлөлийн бригадын дарга
28. Лувсанбалдангийн Дашзэвэг - Төв аймгийн Батсүмбэр сумын өндөр настан, худалдааны байгууллагын ахмад ажилтан
29. Гармаагийн Долгосүрэн - Усны хэрэг эрхлэх газрын "Монгол орны усны нэгдсэн менежментийг бэхжүүлэх нь" төслийн менежер
30. Нямсүрэнгийн Дэлэг - Төв аймгийн "Тунгалаг-Ус" ХХК-ийн захирал
31. Дэлэгдоржийн Жадамбаа - Монгол Улсаас Арабын Бүгд Найрамдах Египет Улсад суугаа Онц бөгөөд Бүрэн эрхт Элчин сайдын яамны аж ахуйн эрхлэгч-жолооч
32. Лүнтэнгийн Жанчивдорж - Геоэкологийн хүрээлэнгийн усны нөөц, ус ашиглалтын салбарын эрхлэгч
33. Аюурзанын Жаргалсайхан - Өмнөговь аймгийн усны аж ахуйн "Түний ус" ХХК-ийн захирал
34. Цамбын Жигдэн - Радио, телевизийн сүлжээний газрын ерөнхий нягтлан бодогч
35. Чонойн Куланда - Боловсрол, соёл, шинжлэх ухааны дэд сайд
36. Пүрэвсүрэнгийн Лхагвасүрэн - Орхон аймгийн Орон нутгийн өмчийн албаны дарга
37. Лантуугийн Магсаржав - Дорноговь аймгийн "Усжуулагч" ХХК-ийн жолооч
38. Ядамын Мөнхжаргал - Нийслэлийн Сүхбаатар дүүргийн 7 дугаар хорооны иргэн, хувиараа хөдөлмөр эрхлэгч
39. Түмэнгийн Намсрайжав - Нийслэлийн Баянгол дүүргийн 3 дугаар хорооны өндөр настан, ахмад кино найруулагч
40. Долгорын Натар - Нийслэлийн Мэргэжлийн хяналтын газрын Сонгинохайрхан дүүрэг дэх мэргэжлийн хяналтын хэлтсийн улсын ахлах байцаагч
41. Гомбын Нээв - Нийслэлийн Чингэлтэй дүүргийн 2 дугаар хорооны өндөр настан, ахмад багш
42. Балжингийн Нямаа - Ахмад дипломатч
43. Даваагийн Нямааваа - Булган аймгийн усны аж ахуйн "Булган –Ундарга" ХК-ийн өрмийн зөвлөх мастер



44. Цогтын Нямсүрэн - Монгол Улсаас Бүгд Найрамдах Чех Улсад суугаа Онц бөгөөд Бүрэн эрхт Элчин сайдын яамны зөвлөх
45. Дарьбазарын Очиржанцан - Завхан аймгийн усны аж ахуйн "Уст хайрхан" хоршооны бригадын дарга
46. Дарьхүүгийн Оюун - Сангийн яамны Хяналт шинжилгээ, үнэлгээний хэлтсийн дарга
47. Цэзэнгийн Оюун - Увс аймгийн усны аж ахуйн "Ус-Эрдэнэ" ХХК-ийн захирал
48. Пүрэвсүрэнгийн Оюунбилэг - Төв аймгийн Угтаалцайдам сумын Засаг даргын Тамгын газрын дарга
49. Хунгаагийн Оюундэлгэр - Сангийн яамны Төсвийн бодлого зохицуулалтын газрын ахлах мэргэжилтэн
50. Гончигсүрэнгийн Оюунчимэг - ГХЯ-ны Худалдаа, эдийн засгийн хамтын ажиллагааны газрын ахлах мэргэжилтэн
51. Далхжавын Оюунчимэг - Улсын Мэргэжлийн хяналтын газрын Эрүүл мэнд, боловсролын хяналтын улсын албаны дарга
52. Дамбын Оюунчимэг - Төв аймгийн Нийгмийн даатгалын хэлтсийн тэтгэврийн байцаагч
53. Дандарын Оюунчимэг - Үндэсний статистикийн газрын Статистикийн төлөвлөлт, зохицуулалтын газрын хүн ам, нийгмийн статистикийн хэлтсийн дарга
54. Жигжидийн Пүрэвжав - "Монголын цанаачдын холбоо" төрийн бус байгууллагын Ахмадын зөвлөлийн дарга
55. Мангалын Пүрэвдорж - Завхан аймгийн усны аж ахуйн "Тэсийн бүрд" ХХК-ийн жолооч, авто механик
56. Ламдангийн Рагчаадорж - Увс аймгийн "Барилгын инженерүүд" ХХК-ийн захирал
57. Пагмын Санжаа - Дорноговь аймгийн усны аж ахуйн "Усжуулагч" ХХК-ийн засварын цехийн мастер
58. Мижидийн Содномжамц - Говь-Алтай аймгийн Онцгой байдлын хэлтсийн дарга, дээд ахмад
59. Долгорын Сумъяа - Дархан-Уул аймгийн 11 жилийн 15 дугаар сургуулийн захирал
60. Төрбадрахын Төмөрбаатар - Завхан аймгийн Дөрвөлжин сумын малчин
61. Шаравдоржийн Түвдэндорж Монголын Ардчилсан Холбооны дэд дарга
62. Цэрэнгийн Түдэв - Нийслэлийн худалдаа, үйлчилгээний "Энергостар" ХХК-ийн нягтлан бодогч
63. Отгоны Түмэнжаргал - Дорноговь аймгийн усны аж ахуйн "Усжуулагч" ХХК-ийн жолооч
64. Санжийн Ургамал - Увс аймгийн "Хүдэнгийн уурхай" ХХК-ийн захирал
65. Дашзэвэгийн Халтмай - Сүхбаатар аймгийн өндөр настан, төр захиргааны байгууллагын ахмад ажилтан
66. Жанжаахүүгийн Халтар - Нийслэлийн барилгын Монгол-Хятадын хамтарсан "Зуншин" ХХК-ийн гүйцэтгэх захирал
67. Нацагийн Хишгээ - Сэлэнгэ аймгийн Ерөө сумын ҮЭ-ийн хорооны дарга
68. Жамъяндоржийн Хишигдорж - Төв аймгийн Баянцагаан сумын Засаг даргын орлогч, Төрийн сангийн төлөөлөгч
69. Цэрэнгийн Хорлоо - Дорнод аймгийн "Худалдаа, эд хэрэглэгчдийн холбоо" - ны гишүүн, худалдагч
70. Жутааны Хумбаа - Увс аймгийн Малчин сумын өндөр настан
71. Сономцэвээний Хүрэлбаатар - "Монголын хараагүйчүүдийн үндэсний холбоо" төрийн бус байгууллагын гишүүн, чөлөөт уран бүтээлч
72. Насангийн Цогтсайхан - Улсын Их Хурлын Тамгын газрын ахлах зөвлөх
73. Хишигдоогийн Цэвэлгомчиг - УБТЗ-ын дуу бүжгийн чуулгын ахмад хөгжимчин
74. Дашзэвэгийн Цэрмаа - Нийслэлийн Налайх дүүргийн "Голомт" цогцолбор сургуулийн бага ангийн багш
75. Лхасүрэнгийн Цэрмаа - Клиникийн 1 дүгээр амаржих газрын эх баригч-бага эмч
76. Санжаагийн Цэрэнпил - Геоэкологийн хүрээлэнгийн зураг төслийн зөвлөх инженер
77. Базын Чулуунбаатар - Нийслэл дэх худалдаа, үйлчилгээний "Моннис интернэшнл" ХХК-ийн ерөнхий захирал
78. Чүлхэрэмийн Шархүү - Дундговь аймгийн "Чандмань-Дундговь" ХК-ийн бригадын засварчин, жолооч
79. Пүрэвжавын Эрдэнэбат - Завхан аймгийн усны аж ахуйн "Уст хайрхан" хоршооны гидрогеолог инженер
80. Пүрэвсүрэнгийн Энхбаяр - Монгол Улсаас ОХУ-д суугаа Онц бөгөөд Бүрэн эрхт Элчин сайдын яамны аж ахуй хариуцсан зөвлөх
81. Даанайн Энхтуяа - Увс аймгийн Эд хөрөнгийн эрхийн улсын бүртгэлийн албаны дарга
82. Чойжилын Ядам - Дархан-Уул аймгийн усны аж ахуйн "Дархан-Ус суваг" ХК-ийн Ахмадын зөвлөлийн дарга



ЦЭРГИЙН ГАВЪЯАНЫ ОДОНГООР:

1. Ендонгийн Амарбаясгалан - Нийслэлийн Сүхбаатар дүүргийн Онцгой байдлын хэлтсийн дарга, дээд ахмад

2. Доржгочоогийн Рэнчиндорж - Архангай аймгийн Онцгой байдлын хэлтсийн дарга, дээд ахмад

ХӨДӨЛМӨРИЙН ХҮНДЭТ МЕДАЛИАР:

1. Сүхбаатарын Амарсанаа - Шүүх эрх мэдлийн шинэтгэлийн хөтөлбөрийн олон нийтийн боловсрол эрхэлсэн зохицуулагч

2. Цэрэнчимэдийн Амарсанаа - Телевизийн дамжуулах станцын антенны техникч

3. Чойжилсүрэнгийн Амгаабазар - Нийслэл дэх усны аж ахуйн "Престиж инженеринг" ХХК-ийн угсралтын инженер

4. Лувсангийн Баасгай - Нийслэлийн Багахангай дүүргийн Иргэдийн Төлөөлөгчдийн Хурлын дарга

5. Гаанжуурын Баатархүү - Монгол шуудан" ХХК-ийн хүргэгч-жолооч

6. Доохүүгийн Бадарч - Сүхбаатар аймгийн Дарьганга сумын татварын улсын байцаагч

7. Гурдагвын Батжаргал - Төв аймгийн Засаг даргын Тамгын газрын үйлчилгээний албаны дарга

8. Равдангийн Баттогтох - Дархан-Уул аймгийн усны аж ахуйн "Дархан-Ус суваг" ХК-ийн тракторчин

9. Бэгзийн Батхуяг - ШУТИС-ийн Барилгын инженер, архитектурын сургуулийн дэд профессор

10. Бадрахын Бат-Эрдэнэ - Нийслэл дэх эрчим хүчний "Хасу-Эрчим" ХХК-ийн захирал

11. Цэвэлмаагийн Болд - Нийслэл дэх үйлдвэр, худалдааны "Ханын материал" ХК-ийн үйлдвэрийн дарга

12. Даваадоржийн Булган - Нийслэлийн Баянзүрх дүүргийн 20 дугаар хорооны нийгмийн ажилтан

13. Довдонгийн Булган - Нийслэлийн Чингэлтэй дүүргийн Засаг даргын Тамгын газрын Үйлдвэрлэл, тохижилт үйлчилгээний хэлтсийн дарга

14. Дамдингийн Гаваа - Завхан аймгийн Түдэвтэй сумын холбооны салбарын ахлагч

15. Далхаагийн Галбадрах - БХЯ-ны харьяа Дүрэмт хувцасны оёдлын "Бөртэ" ТӨҮГ-ын оёдлогчин

16. Жамцын Ганболд - Орхон аймаг дахь уулын баяжуулах "Эрдэнэт" үйлдвэрийн эргэлтийн ус хангамжийн хэсгийн машинч

17. Сүхбатын Ганзориг - Завхан аймгийн Цагаанхайрхан сумын Засаг дарга

18. Отгоны Гантулга - Булган аймгийн Хүнс, хөдөө аж ахуйн газрын дарга

19. Төржаргалын Гончигсумлаа - Нийслэлийн "Соёл" дээд сургуулийн тэнхимийн эрхлэгч

20. Лувсаньямаагийн Гүмэнжав - ГХЯ-ны Худалдаа, эдийн засгийн хамтын ажиллагааны газрын ахлах мэргэжилтэн

21. Очирбатын Дагвадорж - Нийслэл дэх усны аж ахуйн "Престиж инженеринг" ХХК-ийн ахлах инженер

22. Нолсоны Долгорсүрэн - Клиникийн 1 дүгээр амаржих газрын сувилагч

23. Пүрвээгийн Дэлгэрсайхан - Нийслэлийн Сүхбаатар дүүргийн Нийгмийн даатгалын газрын бодлого төлөвлөлт хариуцсан менежер

24. Чойжилсүрэнгийн Жавзан - Геоэкологийн хүрээлэнгийн экологийн судалгааны салбарын эрхлэгч

25. Жамъяны Жавзандолгор - Хэнтий аймгийн Баянхутаг сумын 1 дүгээр багийн малчин

26. Мэдэрийн Жаргал - Увс аймгийн Улаангом сумын "Дун цагаан" өрхийн эмнэлгийн их эмч

27. Галсанбалдангийн Занданхүү - Нийслэлийн "Улаанбаатар цахилгаан түгээх сүлжээ" ХК-ийн дэд захирал

28. Нацагдоржийн Зандраасүрэн - Нийслэл дэх хувийн хэвшлийн "Таны төлөө бид" эмнэлгийн мэс заслын сувилагч

29. Чойпилын Иванов - Орхон аймаг дахь Гаалийн газрын гаалийн улсын байцаагч

30. Санжмятавын Лида - Сүхбаатар аймгийн усны аж ахуйн "Баруун-Урт ус" ХК-ийн дэд захирал

31. Доржхүүгийн Лонжидсүрэн - Архангай аймгийн Ихтамир сумын мал эмнэлгийн "Дашбанзад" хоршооны эзэн

32. Дуламсүрэнгийн Лхагва - Зэвсэгт хүчний Клиникийн төв госпиталийн мэс заслын тасгийн боолтын сувилагч

33. Самдангийн Лхагвадорж - Нийслэлийн усны аж ахуйн "Престиж инженеринг" ХХК-ийн зургийн инженер

34. Долгорын Махвал - Завхан аймгийн Тосонцэнгэл сумын хүн эмнэлгийн салбарын эрхлэгч

35. Цэрэндашийн Монхор - Завхан аймгийн усны аж ахуйн "Тэсийн бүрд" ХХК-ийн бригадын дарга

36. Дарьзавын Моонон - Сүхбаатар аймгийн "Тэмүүлэл" цогцолбор сургуулийн аж ахуйн менежер

37. Дондовын Мэндсайхан - Нийслэлийн Соёл урлагийн газрын уран сайхны удирдагч
38. Цэдэн-Ишийн Наваансүрэн - Онцгой байдлын ерөнхий газрын харьяа Ховд аймаг дахь улсын нөөцийн салбарын нягтлан бодогч, дээд дэслэгч
39. Гарамжавын Намсрай - Сэлэнгэ аймгийн "Сэлэнгэ АЗЗА" ХК-ийн замчин-жолооч
40. Цэвээний Нарангэрэл - Завхан аймгийн усны аж ахуйн "Тэсийн бүрд" ХХК-ийн гагнуурчин
41. Охиножавын Нарандулам - Дархан-Уул аймгийн барилга угсралтын "Хашцамхаг" ХХК-ийн инженер
42. Жүгдэрийн Наранцацралт - Дархан-Уул аймгийн "Оюуны ирээдүй" цогцолбор сургуулийн багш
43. Санжжавын Насанбат - Зам, тээвэр, барилга, хот байгуулалтын яамны Тээврийн үйлчилгээний төвийн ахлах мэргэжилтэн
44. Довдонгийн Нугаман - Сэлэнгэ аймгийн "Сэлэнгэ АЗЗА" ХК-ийн салбарын эрхлэгч
45. Гармаагийн Нэргүй - Нийслэлийн нийтийн тээврийн "Автобус-1" ХК-ийн жолооч
46. Гомбосүрэнгийн Нэргүй - Зэвсэгт хүчний 032 дугаар ангийн тооцооны нягтлан бодогч
47. Санжийн Нямдорж - Архангай аймгийн Эрдэнэбулган сумын ус суваг ашиглалтын "Ундарга" ХХК-ийн захирал
48. Дарамбазарын Нямсүрэн - СУИС-ийн харьяа Завхан аймаг дахь Хөгжим бүжгийн коллежийн ардын хөгжмийн тэнхимийн эрхлэгч
49. Сэнгийн Оргодол - Нийслэлийн Гачуурт тосгоны хүн эмнэлгийн бага эмч
50. Гаваагийн Оюун-"Монголын барилгачдын холбоо" төрийн бус байгууллагын гүйцэтгэх захирал
51. Анандын Оюунцэцэг - Монголын хөгжлийн бэрхшээлтэй иргэдийг дэмжих "Эрхэм чанар" төрийн бус байгууллагын тэргүүн
52. Аюурзанын Оюунчимэг - Клиникийн 1 дүгээр амаржих газрын эм найруулагч
53. Бадарчийн Оюунчимэг - Клиникийн 1 дүгээр амаржих газрын эх баригч
54. Даасүрэнгийн Өлзийбат - СУИС-ийн харьяа Завхан аймаг дахь Хөгжим бүжгийн коллежийн ахлах тогооч
55. Лувсанжамцын Пунцаг - Онцгой байдлын ерөнхий газрын харьяа Орхон аймаг дахь улсын нөөцийн салбарын харуул
56. Бадамын Пүрэвцэвэн - Ховд аймгийн Эрдэнэбүрэн сумын хүн эмнэлгийн дүн бүртгэгч бага эмч
57. Шагдарын Солонго - Төв аймгийн Угтаалцайдам сумын Засаг даргын орлогч
58. Дэмидийн Сүрэн - Сэлэнгэ аймгийн Орхон сумын Засаг даргын Тамгын газрын хөлөлмөр халамж үйлчилгээний байцаагч
59. Шаравын Сэлэнгэ - ГХЯ-ны Төрийн захиргаа, удирдлагын газрын дипломат шуудан-нууцны эрхлэгч
60. Дэлзгийн Төмөр-Очир - TV-9 телевизийн менежер
61. Гэндаваагийн Удвалцэцэг - Геоэкологийн хүрээлэнгийн эрдэм шинжилгээний ажилтан
62. Цэвээний Хандсүрэн - Онцгой байдлын ерөнхий газрын харьяа Төв аймгийн Цээл сум дахь улсын нөөцийн салбарын дарга, дээд дэслэгч
63. Цэвэгжамцын Хуягбаатар - Онцгой байдлын ерөнхий газрын харьяа Хэнтий аймаг дахь улсын нөөцийн салбарын дарга, шадар ахмад
64. Цэндийн Хуягбаатар - Төв аймгийн усны аж ахуйн "Тунгалаг-Ус" ХХК-ийн инженер
65. Махбуриадын Цогзолмаа - Б Х Я - н ы харьяа Дүрэмт хувцасны оёдлын "Бөртэ" ТӨҮГ-ын оёдолчин
66. Сандуйжавын Цэнджаргал - Төр, засгийн Үйлчилгээ, аж ахуйг эрхлэх газрын бригадын ахлагч
67. Цэдэвийн Цэцгээ - Клиникийн 1 дүгээр амаржих газрын нярайн ахлах сувилагч
68. Охиноогийн Цэцэгмаа - Клиникийн 1 дүгээр амаржих газрын эх баригч
69. Жавын Цээлэй - Увс аймгийн ус цаг уурын "Улаангом" өртөөний техникч
70. Дашдоржийн Цээсүрэн - "Монгол шуудан" ХХК-ийн 46 дугаар салбарын ялгагч
71. Нямжавын Чанрав - Завхан аймгийн усны аж ахуйн "Амь - Ус трейд" ХХК-ийн машинист
72. Цэрэнжавын Шагдарсүрэн - Нийслэл дэх усны аж ахуйн "Престиж инженеринг" ХХК-ийн ахлах инженер
73. Дагвадоржийн Энхбат - Дархан-Уул аймгийн "Залуучууд" театрын гоцлол дуучин
74. Ядамын Энхбат - Завхан аймгийн усны аж ахуйн "Уст хайрхан" хоршооны ермийн ахлах мастер
75. Доржхандын Энхжаргал - Нийслэлийн Чингэлтэй дүүргийн 11 жилийн 5 дугаар сургуулийн бага ангийн багш
76. Жамъянгийн Энхцаг - Ховд аймгийн Эрдэнэбүрэн сумын хүн эмнэлгийн их эмч
77. Бямбасүрэнгийн Эрдэнэ - Булган аймгийн усны аж ахуйн "Булган-Ундарга" ХК-ийн ермийн мастер, жолооч



78. Бямбаагийн Эрдэнэцэцэг - Зэвсэгт хүчний Барилгын цэргийн 017 дугаар ангийн төсвийн инженер

79. Самбуугийн Эрдэнэчимэг - Нийслэлийн Баянгол дүүргийн 13 дугаар сургуулийн захирал

ЦЭРГИЙН ХҮНДЭТ МЕДАЛИАР:

1. Махсутын Амантай - Баян-Өлгий аймгийн Онцгой байдлын хэлтсийн нярав, багны засварчин, дээд түрүүч

2. Батхандын Амарсанаа - Сэлэнгэ аймгийн Онцгой байдлын хэлтсийн ажлын албаны дарга, тэргүүн ахмад

3. Дагдандоржийн Ариундалай - Онцгой байдлын ерөнхий газрын Холбоо мэдээллийн хэлтсийн дарга, дээд ахмад

4. Батаагийн Батсайхан - Зэвсэгт хүчний 014 дүгээр ангийн жолооч, ахлах ахлагч

5. Дугарсүрэнгийн Бямбацогт - Нийслэлийн Онцгой байдлын газрын Гал түймэртэй тэмцэх хэлтсийн дарга, дээд ахмад

6. Сандагдоржийн Даваасүрэн - Хөвсгөл аймгийн Онцгой байдлын хэлтсийн дарга, дээд ахмад

7. Басангийн Лхамжав - Дархан-Уул аймгийн Онцгой байдлын газрын гамшгаас хамгаалах улсын хяналтын байцаагч, шадар ахмад

8. Хасын Мөнхжаргал - Онцгой байдлын ерөнхий газрын мэргэжилтэн, дээд ахмад

9. Загарын Мянганбуу - Орхон аймгийн Онцгой байдлын хэлтсийн гэрээт гал унтраах 58 дугаар ангийн аврагч-жолооч, дээд түрүүч

10. Галаагийн Пүрэв - Зэвсэгт хүчний 256 дугаар ангийн нууцын дарга, ахлах ахлагч

11. Санжжавын Цэндсүрэн - Нийслэлийн Багануур дүүргийн Онцгой байдлын хэлтсийн дарга, дээд ахмад

12. Борын Чинзориг - Зэвсэгт хүчний 189 дүгээр ангийн холбооны жижүүр, хошууч

13. Аюурзаны Энхбат - Онцгой байдлын ерөнхий газрын Гамшигтай тэмцэх газрын мэргэжилтэн, тэргүүн ахмад

14. Дансрангийн Энхболд - Зэвсэгт хүчний Барилгын цэргийн 017 дугаар ангийн барилгачин

15. Пүрэвцэрэнгийн Эрдэнэбаатар - Зэвсэгт хүчний 186 дугаар ангийн ашиглалтын инженер, ахлах дэслэгч

"ШУДАРГА ЖУРАМ" МЕДАЛИАР:

Чинзоригийн Баттүвшин - УБТЗ-ын харъяа Сэлэнгэ аймаг дахь цэрэгжүүлсэн хамгаалах салааны харуулч

МОНГОЛ УЛСЫН
ЕРӨНХИЙЛӨГЧ

Н.ЭНХБАЯР

МОНГОЛ УЛСЫН ЗАСГИЙН ГАЗРЫН ТОГТООЛ

2008 оны 12 дугаар сарын 3-ны өдөр

Дугаар 49

Улаанбаатар хот

Журам батлах тухай

Монгол Улсын иргэний цэргийн үүргийн болон цэргийн албан хаагчийн эрх зүйн байдлын тухай хуулийн 12 дугаар зүйлийн 5 дахь хэсэгт заасныг үндэслэн Монгол Улсын Засгийн газраас ТОГТООХ нь:

1. "Цэргийн албыг дүйцүүлэн хаах журам"-ыг хавсралтын ёсоор шинэчлэн баталсугай.

2. Энэ тогтоол гарсантай холбогдуулан "Журам батлах тухай" Засгийн газрын 1998 оны

2 дугаар сарын 12-ны өдрийн 15 дугаар тогтоолын 1 дүгээр хавсралтыг хүчингүй болсонд тооцсугай.

МОНГОЛ УЛСЫН
ЕРӨНХИЙ САЙД

С.БАЯР

БАТЛАН ХАМГААЛАХЫН
САЙД

Л.БОЛД

Засгийн газрын 2008 оны 49 дүгээр тогтоолын хавсралт

ЦЭРГИЙН АЛБЫГ ДҮЙЦҮҮЛЭН ХААХ ЖУРАМ

Нэг. Нийтлэг үндэслэл

1. Монгол Улсын иргэний цэргийн үүргийн болон цэргийн алба хаагчийн эрх зүйн байдлын тухай хуулийн 12 дугаар зүйлийн 5 дахь хэсэгт заасны дагуу Монгол Улсын иргэн

цэргийн албыг дүйцүүлэн хаахад энэ журмыг дагаж мөрдөнө.

2. Монгол Улсын 18-25 насны, цэргийн хоёрдугаар зэргийн бэлтгэл үүрэг бүхий иргэн энэ журамд заасны дагуу өөрийн хүсэлтээр орон нутаг

дахь батлан хамгаалах үйл ажиллагаанд дэмжлэг үзүүлэх, түүнчлэн онцгой байдлын асуудал хариуцсан чиг үүрэг бүхий алба, мэргэжлийн анги, салбар, хилийн цэрэгт туслах хүчин, хүмүүнлэгийн бусад байгууллага (цаашид "алба хаалгагч байгууллага" гэнэ)-д цэргийн албыг дүйцүүлэн хааж болно.

3. Монгол Улсын иргэн (цаашид "иргэн" гэх)-ий цэргийн албыг дүйцүүлэн хаах хугацааг хуулиар зохицуулна.

4. Цэргийн албыг дүйцүүлэн хаах иргэний тооны дээд хязгаарыг батлан хамгаалах асуудал хариуцсан төрийн захиргааны төв байгууллагын саналыг үндэслэн Засгийн газар жил бүрийн I улиралд багтаан аймаг, нийслэл бүрээр тогтооно.

5. Иргэнээр цэргийн албыг дүйцүүлэн хаалгах арга хэмжээг тухайн аймаг, нийслэлийн Засаг дарга нутаг дэвсгэрийн зарчмаар зохион байгуулна.

6. Цэргийн албыг дүйцүүлэн хааж байгаа иргэний сургалт, дадлага, орон нутаг дахь батлан хамгаалах үйл ажиллагаа, гамшгаас хамгаалах дайчилгаа (цаашид "дайчилгаа" гэх), цугларалт болон хил хамгаалалтад оролцсоныг үүргээ гүйцэтгэсэнд тооцно.

Хоёр. Дүйцүүлэх албанд иргэнийг авах

7. Иргэнийг дараахь шалтгаанаар цэргийн дүйцүүлэх албанд элсүүлж болно:

а) сүм, хийдэд албан ёсоор шавилан суугаа;

б) шашин шүтлэг-ёс зүйн шалтгаанаар цэргийн жинхэнэ алба хаах боломжгүй болохыг цэрэг татлагын товчоо тодорхойлсон;

в) хил орчмын нутагт байнга оршин сууж хил хамгаалалтад туслах гишүүний үүргийг биелүүлдэг.

8. Иргэн цэргийн албыг дүйцүүлэн хаахыг хүссэн өргөдлөө сүм, хорооны Засаг даргаар уламжлан харьяалагдах цэрэг татлагын товчоонд гаргана.

Гурав. Цэргийн албыг дүйцүүлэн хаах

9. Аймаг, нийслэл, сум, дүүргийн Засаг даргын Тамгын газар, онцгой байдлын асуудал хариуцсан чиг үүрэг бүхий алба, мэргэжлийн анги, салбар, хилийн хорооны удирдлага тухайн цэрэг татлагын товчооны шийдвэр, хуваарийн дагуу цэргийн албыг дүйцүүлэн хаах иргэдийг хүлээн авч бүртгэн, уг албыг хаалгах ажлыг зохион байгуулна.

10. Цэргийн албыг дүйцүүлэн хааж байгаа иргэн нь аймаг, нийслэл, сум, дүүргийн Засаг даргын шийдвэрийн дагуу дараахь үүрэг гүйцэтгэнэ:

а) орон нутаг дахь батлан хамгаалах үйл ажиллагаанд оролцох;

б) аюулт үзэгдэл, техникийн холбогдолтой осол, байгалийн болон нийтийг хамарсан гамшиг (ой, хээрийн түймэр, усны үер, ган, зуд, цөлжилт, хүчтэй цасан болон шороон шуурга, газар хөдлөлт, дэлбэрэлт, цацраг идэвхт болон хүчтэй үйлчилгээтэй хорт бодис алдагдах зэрэг)-ийн аюулаас урьдчилан сэргийлэх, тэдгээрээс хүн ам, мал амьтан, эд хөрөнгө, хүрээлэн байгаа орчныг хамгаалах, түүнтэй тэмцэх, аврах, хор уршгийг арилгах, хойшлуулшгүй сэргээн босгох ажиллагаанд оролцох;

в) хүн, малын гоц халдварт өвчний үед тогтоосон хорио цээрийн дэглэмийг сахиулахад дэмжлэг үзүүлэх;

г) улсын хилийн бус, зурваст улсын хилийн болон хил орчмын дэглэмийг сахиулахад оролцох;

д) хүмүүнлэгийн үйл ажиллагаанд туслалцаа үзүүлэх;

е) улс орны хэмжээнд хэрэгжүүлж байгаа бүтээн босголтын ажилд зохион байгуулалттай оролцох.

11. Цэргийн албыг дүйцүүлэн хааж байгаа иргэн тухайн сум, дүүргийн Засаг дарга, алба хаалгагч байгууллагаас дуудсан хугацаанд хувийн бэлтгэлээ ханган ирж, оногдуулсан үүргийг гүйцэтгэнэ.

12. Цэргийн албыг дүйцүүлэн хааж байгаа иргэн алба хаах хугацаандаа 6 сараас доошгүй хугацаагаар дүйцүүлэх албаны оногдуулсан үүргийг биечлэн гүйцэтгэсэн байна.

13. Цэргийн штаб, иргэн болон алба хаалгагч байгууллага цэргийн албыг дүйцүүлэн хаах тухай гэрээ байгуулна.

Дөрөв. Дүйцүүлэх албаны сургалт

14. Цэргийн албыг дүйцүүлэн хаах шийдвэр гарсан иргэний цэргийн анхан шатны бэлтгэл болон үүрэг гүйцэтгэхэд шаардагдах мэдлэг, дадлага эзэмшүүлэх сургалтыг аймаг, нийслэл, дүүргийн Цэргийн штаб, алба хаалгагч байгууллага хамтран зохион байгуулна. Дайчилгааны бэлтгэл нөөцийн 2 дугаар зэргийн бэлтгэл үүрэгтний сургалтын хөтөлбөрийн дагуу цэргийн анхан шатны бэлтгэл сургалтыг жилд 1 удаа, гүйцэтгэх үүргийн мэдлэг, дадлагыг гүнзгийрүүлэх сургалтыг жилд 2-оос доошгүй удаа тус бүр 14 хоногийн хугацаагаар зохион байгуулж явуулна. Сургалтын хөтөлбөрийн 30 хүртэл хувьд орон нутгийн онцлогийг харгалзан зохих өөрчлөлт оруулж болно.

15. Цэргийн албыг дүйцүүлэн хааж байгаа иргэний сургалт, дадлагын ном, сурах бичиг, үзүүлэн таниулах материал, гарын авлага, техник хэрэгслийн жагсаалтыг алба хаалгагч байгууллага тогтоож, хангана.

16. Аулслагдсан сум, сум дундын болон багийн эмнэлэгт эмч, сум, багийн сургуульд багшаар ажиллаж байгаад цэргийн албыг дүйцүүлэн хаасанд тооцогдсон иргэн цэргийн анхан шатны бэлтгэл сургалтад заавал хамрагдана.

17. Цэргийн албыг дүйцүүлэн хааж байгаа иргэний цэргийн анхан шатны бэлтгэл болон үүрэг гүйцэтгэхэд шаардагдах мэдлэг, дадлага эзэмшүүлэх сургалтыг бүсчилсэн хэлбэрээр зохион байгуулж болно.

Тав. Дүйцүүлэх алба хааж байгаа иргэний хүлээх үүрэг

18. Цэргийн албыг дүйцүүлэн хааж байгаа иргэн дараахь нийтлэг үүрэг хүлээнэ:

а) томилгоот үүргээ биелүүлэх мэдлэг, чадвар эзэмшсэн байх;

б) цэргийн албыг дүйцүүлэн хаах хугацаанд өөрийн ажил, амьдралыг албаны эрх ашигт нийцүүлэн зохицуулах;

в) даалгасан үүргийг шударга, хариуцлагатай биелүүлэх;

г) дайчилгаа зарласан болон цугларах дохио хүлээн авмагц заасан газар, тогтоосон хугацаанд хувийн бэлтгэлээ бүрэн ханган хүрэлцэн ирж, оногдуулсан үүргийг гүйцэтгэх;

д) тухайн орон нутгаас 5-аас дээш хоноогоор гадагш явах тохиолдолд заавал аймаг, дүүргийн Цэргийн штаб эсхүл сумын Засаг даргын Тамгын газраас зөвшөөрөл авах;

е) сум, дүүргийн Засаг дарга, алба хаалгагч байгууллагын удирдлагын шийдвэрийг биелүүлэх;

ж) оногдуулсан үүрэгтэй нь холбоотой зөрчил гарсан үед энэ тухай сум, дүүргийн Засаг дарга, алба хаалгагч байгууллагын удирдлагад шуурхай мэдэгдэх.

Зургаа. Засаг захиргаа, нутаг дэвсгэрийн нэгж, алба хаалгагч байгууллагын чиг үүрэг

19. Аймаг, нийслэлийн Иргэдийн төлөөлөгчдийн Хурал дараахь чиг үүрэг хэрэгжүүлнэ:

а) Засгийн газраас тогтоосон цэргийн албыг дүйцүүлэн хаах иргэдийн тооны дээд хязгаарыг үндэслэн сум, дүүрэгт алба хаах иргэний тоог батлах;

б) аймгийн Иргэдийн төлөөлөгчдийн Хурал тухайн жилд цэргийн албыг дүйцүүлэн хаах иргэний сургалт, бусад шаардагдах зардлыг батлах;

в) цэргийн албыг дүйцүүлэн хааж байгаа иргэнд үүрэг гүйцэтгэхэд шаардагдах эд материалын жагсаалтыг батлах.

20. Сум, дүүргийн Иргэдийн төлөөлөгчдийн Хурал дараахь чиг үүрэг хэрэгжүүлнэ:

а) цэргийн албыг дүйцүүлэн хаах иргэний нэрсийн жагсаалтыг батлах;

б) дүүргийн Иргэдийн төлөөлөгчдийн Хурал тухайн жилд цэргийн албыг дүйцүүлэн хаах иргэний сургалт, бусад шаардагдах зардлыг батлах.

21. Аймаг, нийслэлийн Засаг дарга дараахь чиг үүрэг хэрэгжүүлнэ:

а) цэргийн албыг дүйцүүлэн хаах иргэний тооны талаархи саналаа батлан хамгаалах асуудал хариуцсан төрийн захиргааны төв байгууллагад жил бүрийн 12 дугаар сард багтаан гаргаж өгөх;

б) цэргийн албыг дүйцүүлэн хаах иргэний сургалт, алба хаахтай холбогдон гарах зардлын төсвийн төслийг Иргэдийн төлөөлөгчдийн Хурлаар батлуулах;

в) Иргэдийн төлөөлөгчдийн Хурлаар батлагдсан жагсаалт болон Цэргийн штабын саналыг тус тус үндэслэн цэргийн дүйцүүлэх албыг хаалгах, халах тухай шийдвэр гэрэх;

г) цэргийн албыг дүйцүүлэн хаах иргэдийн цэргийн анхан шатны бэлтгэл сургалт зохион байгуулах;

д) цэргийн албыг дүйцүүлэн хааж байгаа иргэн оногдуулсан үүргээ үнэнчээр биелүүлж амжилт гаргавал тэднийг шагнах, урамшуулах, дээд шатны байгууллагын шагналд тодорхойлох.

22. Сум, дүүргийн Засаг дарга дараахь чиг үүрэг хэрэгжүүлнэ:

а) сумын Засаг дарга цэргийн албыг дүйцүүлэн хаах хүсэлт гаргасан иргэний хүсэлт, үндэслэлийг нарийвчлан хянаж, Иргэдийн төлөөлөгчдийн Хурлын тэргүүлэгчтэй зөвшилцөн саналаа аймгийн Засаг даргад хүргүүлэх;

б) цэргийн албыг дүйцүүлэн хааж байгаа иргэний сургалт, цугларалт, дайчилгаа, өдөр тутмын үйл ажиллагааг удирдан зохион байгуулах;

в) цэргийн албыг дүйцүүлэн хааж байгаа иргэний үүрэг гүйцэтгэх үеийн аюулгүй байдлыг хангуулах арга хэмжээ авах;

г) цэргийн албыг дүйцүүлэн хааж байгаа иргэн оногдуулсан үүргээ үнэнчээр биелүүлж амжилт гаргавал тэднийг шагнах, урамшуулах, дээд шатны байгууллагын шагналд тодорхойлох;

д) цэргийн албыг дүйцүүлэн хааж байгаа иргэн оногдуулсан үүргээ гүйцэтгэж байх үедээ тахир дутуу болсон, амь насаа алдсан тохиолдолд хууль тогтоомжийн дагуу холбогдох тэтгэвэр, тэтгэмж олгох асуудлыг шийдвэрлүүлэх;



е) цэргийн албыг дүйцүүлэн хаах хугацаандаа хүндэтгэн үзэхээс бусад шалтгаанаар сургалт, цугларалт, дайчилгааг тасалсан, үүрэг биелүүлэхээс татгалзсан, сахилга хариуцлага алдсан, түүнчлэн гэмт хэрэг үйлдсэн иргэнийг уг албанаас хасах саналаа аймгийн Засаг даргад тавьж шийдвэрлүүлэх (дүүргийн Засаг дарга иргэнийг уг албанаас хасах);

ж) шаардлагатай тохиолдолд цэргийн албыг дүйцүүлэн хааж байгаа иргэн оногдуулсан үүргээ гүйцэтгэх үед нь ажлын хувцас, багаж хэрэгслээр хангах арга хэмжээ авах;

з) цэргийн албыг дүйцүүлэн хаах хугацаа дууссан иргэнийг уг албанаас халах тухай саналаа аймгийн Засаг даргад хүргүүлэх (дүүргийн Засаг дарга Иргэдийн төлөөлөгчдийн Хурлаар батлагдсан жагсаалт болон Цэргийн штабын саналыг тус тус үндэслэн цэргийн дүйцүүлэх албыг хаалгах, халах тухай шийдвэр гаргах);

и) алслагдсан сум, сум дундын болон багийн эмнэлэгт эмч, сум, багийн сургуульд багшаар ажиллаж байгаа иргэнийг цэргийн албыг дүйцүүлэн хаасанд тооцуулах тухай саналаа аймгийн Засаг даргад хүргүүлэх.

23. Цэрэг татлагын товчоо дараахь чиг үүрэг хэрэгжүүлнэ:

а) цэргийн албыг дүйцүүлэн хаах хүсэлт гаргасан иргэний өргөдлийг аймаг, дүүргийн Засаг даргад уламжлах;

б) алслагдсан сум, сум дундын болон багийн эмнэлэгт эмч, сум, багийн сургуульд багшаар ажиллаж байгаа иргэнийг цэргийн албыг дүйцүүлэн хаасанд тооцох тухай саналаа аймгийн Засаг даргад тавьж шийдвэрлүүлэх.

24. Цэргийн штаб дараахь чиг үүрэг хэрэгжүүлнэ:

а) аймаг, дүүргийн Засаг даргын шийдвэрийг үндэслэн цэргийн үүрэгтний үнэмлэхэд цэргийн дүйцүүлэх албанд элсүүлсэн болон хугацаа дууссан тухай тэмдэглэл хийх;

б) цэргийн албыг дүйцүүлэн хааж байгаа иргэнд алба хаах хуудас олгох, алба хаасан тэмдэглэлийг хөтлөх;

в) цэргийн албыг дүйцүүлэн хааж байгаа иргэнд мэргэжил, арга зүйн туслалцаа үзүүлэх;

г) цэргийн албыг дүйцүүлэн хааж байгаа байдал, түүний зохион байгуулалт, үйл ажиллагаанд хяналт тавьж, Засаг даргад мэргэжил, арга зүйн туслалцаа үзүүлэх;

д) цэргийн албыг дүйцүүлэн хаахтай холбогдсон бүртгэл, тайлан, мэдээллийн асуудлыг эрхлэх;

е) цэргийн албыг дүйцүүлэн хаагчийн цэргийн анхан шатны бэлтгэл болон үүрэг гүйцэтгэх мэргэжлийн анхан шатны мэдлэг, дадлага эзэмшүүлэх сургалтыг алба хаалгагч байгууллагатай хамтран зохион байгуулах;

ж) цэргийн албыг дүйцүүлэн хаагчтай байгуулсан гэрээний биелэлтийг дүгнэх.

25. Алба хаалгагч байгууллага дараахь чиг үүрэг хэрэгжүүлнэ:

а) цэргийн албыг дүйцүүлэн хаахаар хуваарилагдан ирсэн иргэнийг хүлээн авч, байнга дагаж мөрдөх эрх зүйн баримт бичгүүдийг танилцуулах, үүрэг гүйцэтгэх мэргэжлийн мэдлэг, дадлага эзэмшүүлэх сургалтыг аймаг, дүүргийн Цэргийн штабтай хамтран зохион байгуулах;

б) цэргийн албыг дүйцүүлэн хаагчид үүрэг гүйцэтгэх үед байр, хүнс, тусгай хувцас, хэрэгслээр хангах;

в) цэргийн албыг дүйцүүлэн хааж байгаа иргэн оногдуулсан үүргээ үнэнчээр биелүүлж амжилт гаргавал тэднийг шагнах, урамшуулах, шагналд тодорхойлох;

г) цэргийн албыг дүйцүүлэн хааж байгаа иргэний алба хаасан тухай тодорхойлолтыг аймаг, дүүргийн Цэргийн штабт гаргах, цэргийн үүрэгтний үнэмлэхэд тэмдэглэл хийх;

д) цэргийн албыг дүйцүүлэн хаасан иргэнийг уг албанаас халах тухай санал, тодорхойлолтоо аймаг, дүүргийн Засаг даргад гарган өгч шийдвэрлүүлэх;

е) цэргийн албыг дүйцүүлэн хааж байгаа иргэн оногдуулсан үүргээ гүйцэтгэж байх үедээ тахир дутуу болсон, амь насаа алдсан тохиолдолд хууль тогтоомжийн дагуу холбогдох тэтгэвэр, тэтгэмж олгуулах саналыг эрх бүхий байгууллагад тавих;

ж) гэрээгээр хүлээсэн үүргээ биелүүлээгүй, сахилга хариуцлага алдсан болон бусад шалтгаанаар цэргийн албыг дүйцүүлэн хаах боломжгүй болсон иргэнийг уг албанаас хасах тухай саналаа аймаг, дүүргийн Засаг даргад гаргаж шийдвэрлүүлэх.

26. Аж ахуйн нэгж, байгууллага дараахь чиг үүрэг хэрэгжүүлнэ:

а) цэргийн албыг дүйцүүлэн хаах хүсэлтэй иргэнийг харьяалах сум, дүүргийн Засаг даргад уламжлах;

б) цэргийн албыг дүйцүүлэн хааж байгаа иргэнийг дуудсан хугацаанд үндсэн ажлаас нь чөлөөлж сургалт, цугларалт, дайчилгаанд оролцох, оногдуулсан үүргээ гүйцэтгэх нөхцөл боломжоор хангах;

в) цэргийн албыг дүйцүүлэн хааж байгаа иргэний сургалт, дадлага, дайчилгаа, цугларалт болон хил хамгаалалтад оролцох хугацаанд түүний эрхэлж байсан ажил, албан тушаалыг нь хэвээр хадгалж, дундаж цалин хөлсийг олгох.

Долоо. Бусад зүйл

27. Зарлан дуудсан хугацаанд хүндэтгэн үзэх шалтгаангүйгээр заасан газарт ирээгүй,



сургалт, цугларалт, дайчилгаанаас зайлсхийсэн болон энэхүү журмыг зөрчсөн цэргийн албыг дүйцүүлэн хааж байгаа иргэнийг уг албанаас хасч, холбогдох хууль тогтоомжийн дагуу шийтгэл ногдуулна.

28. Цэргийн дүйцүүлэх албанаас хасагдсан иргэн цэргийн жинхэнэ алба хаах үүргээс чөлөөлөгдөхгүй.

29. Цэргийн дүйцүүлэх албанд иргэнийг авах, уг албыг хаах, түүнээс хасах, халахтай холбогдсон зөрчил, маргааныг аймаг, нийслэл, сум, дүүргийн Засаг дарга холбогдох хууль тогтоомжийн дагуу шийдвэрлэнэ. Засаг даргын шийдвэрийг эс зөвшөөрвөл тухайн иргэн гомдлоо дээд шатны байгууллага буюу шүүхэд гаргана.

МОНГОЛ УЛСЫН ЗАСГИЙН ГАЗРЫН ТОГТООЛ

2008 оны 12 дугаар сарын 3-ны өдөр

Дугаар 50

Улаанбаатар хот

Төрийн болон орон нутгийн өмчийн талаар авч хэрэгжүүлэх зарим арга хэмжээний тухай

Төрийн болон орон нутгийн өмчийн тухай хуулийн 9 дүгээр зүйл, 70 дугаар зүйлийн 4 дэх хэсэгт заасныг үндэслэн Монгол Улсын Засгийн газраас ТОГТООХ нь:

1. Улсын төсвийн хөрөнгө оруулалт, зээл, тусламж, хандивын хөрөнгөөр 2004-2008 онд төрийн болон орон нутгийн өмчлөлд бий болсон хөрөнгийг бүртгэх, үнэлэх, санхүүгийн тайланд бүрэн тусгах ажлыг 2009 оны I улиралд багтаан хэрэгжүүлэх арга хэмжээ авахыг Сангийн сайд С.Баярцогт, Төрийн өмчийн хороо (Д.Сугар), аймаг, нийслэлийн Засаг дарга нарт, дүнг нэгтгэн Засгийн газарт танилцуулахыг Төрийн өмчийн хороо (Д.Сугар)-нд тус тус даалгасугай.

2. Улсын төсвийн болон хувийн хөрөнгө оруулалтаар хайгуул хийж нөөцийг нь тогтоосон ашигт малтмалын орд газруудын хилийн уртраг, өргөрөг болон тусгай зөвшөөрөл эзэмшигчийг нарийвчлан тогтоож орд бүрээр нь нөөцийн нэр төрөл, тоо хэмжээг төрийн өмчийн бүртгэлд тусгах асуудлыг 2009 оны I улиралд багтаан шийдвэрлэх арга хэмжээ авахыг Эрдэс баялаг, эрчим хүчний сайд Д.Зоригт, Төрийн өмчийн хороо (Д.Сугар)-нд даалгасугай.

3. Төсвийн хөрөнгөөр бий болсон оюуны өмчийг бүртгэх, үнэлэх, санхүүгийн тайланд тусгах, хадгалах журам боловсруулж, холбогдох хууль тогтоомжид нийцүүлэн баталж мөрдүүлэхийг Оюуны өмчийн газрын дарга Н.Чинбат, Төрийн өмчийн хороо (Д.Сугар)-нд даалгасугай.

4. Монгол Улсын геодезийн цэг, тэмдэгийн нарийвчилсан тооллого хийх зардлыг улсын төсөвт тусгах арга хэмжээ авахыг Сангийн сайд С.Баярцогтод, тооллогын ажлыг 2010 оны эхний хагас жилд багтаан хийж дуусган ашиглалт, хадгалалт, хамгаалалтад нь хяналт тавьж ажиллахыг Зам, тээвэр, барилга, хот байгуулалтын сайд Х.Баттулга, Хууль зүй, дотоод хэргийн сайд Ц.Нямдорж болон бүх шатны Засаг дарга нарт тус тус даалгасугай.

5. Монгол Улсаас гадаад улсад суугаа Дипломат төлөөлөгчийн газруудын эзэмшилд байгаа газар, үл хөдлөх хөрөнгийг Монгол Улсын болон суугаа орны эрх зүйн орчинд нийцүүлэн баталгаажуулах, маргаантай эд хөрөнгийг холбогдох хууль тогтоомж, гэрээ, хэлэлцээрийн дагуу шийдвэрлүүлэх арга хэмжээ авахыг Гадаад харилцааны сайд С.Батболд, Төрийн өмчийн хороо (Д.Сугар)-нд даалгасугай.

6. Өрхийн эмнэлгийн барилга, эд хөрөнгө болон "Эмийн эргэлтийн сан"-д эзэмшүүлсэн хөрөнгийг орон нутгийн өмчлөлд бүртгэх, ашиглалтад нь хяналт тавьж ажиллах арга хэмжээ авахыг Эрүүл мэндийн сайд С.Ламбаа, аймаг, нийслэлийн Засаг дарга нарт, дүнг 2009 оны II улиралд багтаан Засгийн газарт танилцуулахыг Төрийн өмчийн хороо (Д.Сугар)-нд тус тус даалгасугай.

7. Төрийн болон орон нутгийн өмчийн худаг, услалтын систем, зам, гүүр болон радио, телевиз, үүрэн телефоны радио давтамжийн зурвасыг 2008 оны 12 дугаар сарын байдлаар нарийвчлан тоолж, өмчлөгчийг нь тогтоох, бүртгэлд бүрэн хамруулж, тайлан тэнцэлд тусгах ажлыг 2009 оны 7 дугаар сарын 1-ний дотор шийдвэрлэх арга хэмжээ авахыг Хүнс, хөдөө аж ахуй, хөнгөн үйлдвэрийн сайд Т.Бадамжунай, Зам, тээвэр, барилга, хот байгуулалтын сайд Х.Баттулга, Мэдээлэл, харилцаа холбоо, технологийн газрын дарга Ж.Сансар, Харилцаа холбооны зохицуулах хороо (Б.Болдбаатар)-нд, дүнг нэгтгэн Засгийн газарт танилцуулахыг Төрийн өмчийн хороо (Д.Сугар)-нд тус тус даалгасугай.

8. Төрийн өмчит болон төрийн өмчийн оролцоотой хуулийн этгээдийн эзэмшил газар болон баталгаажуулсан хэмжээг тогтоосон шийдвэрт өөрчлөлт оруулах тухай бүр Төрийн өмчийн хороотой урьдчилан зөвшилцөж байхыг аймаг, нийслэлийн Засаг дарга нарт үүрэг болгосугай.



9. Төрийн болон орон нутгийн өмчийн тооллогоор эд хөрөнгө дутагдуулсан хуулийн этгээдийн удирдлага, холбогдох ажилтанд хариуцлага тооцох, хууль хяналтын байгууллагад шилжүүлэх арга хэмжээ авч, дүнг Төрийн өмчийн хороонд хүргүүлэхийг Төсвийн ерөнхийлөн захирагч нарт даалгасугай.

10. Дор дурдсан арга хэмжээг авч хэрэгжүүлэхийг Төрийн өмчийн хороо (Д.Сугар)-нд даалгасугай:

а) төрийн өмчит болон төрийн өмчийн оролцоотой хуулийн этгээдийн урт хугацааны эзэлийн ашиглалт, түүнийг төлсөн байдлын талаар судалгаа, дүгнэлт гаргаж, шаардлагатай бол тодорхой санал боловсруулан холбогдох эрх бүхий байгууллагаар шийдвэрлүүлэх;

б) тооллогоор дутагдсан хөрөнгийг нөхөн төлүүлэх болон цаашид ашиглах боломжгүй болсон, хэрэгцээнээс илүүдэлтэй үндсэн хөрөнгийг шилжүүлэх, худалдах, данснаас хасах болон өмчлөлийн талаар маргаантай байгаа хөрөнгийн асуудлыг хууль тогтоомжийн дагуу холбогдох яам, Засгийн газрын агентлаг, аймаг, нийслэлийн Засаг даргатай хамтран шийдвэрлэх арга хэмжээ авч, нэгдсэн дүнг 2009 оны 2 дугаар сарын 10-ны дотор Засгийн газарт тайлагнаж;

в) төрийн өмчит болон төрийн өмчийн оролцоотой хуулийн этгээдтэй байгуулсан "Өмч эзэмшлийн гэрээ"-г төрийн өмчийн эд хөрөнгийн эзэмшил, ашиглалт, хадгалалт, хамгаалалтад бүртгэлээр тавих хяналтыг сайжруулахад чиглүүлж, гэрээний заалтыг биелүүлээгүй, өмч хөрөнгө дутагдуулсан, үргэгдүүлсэн, бүртгэл тайланд тусгаагүй буруутай этгээдэд гэрээ болон зохих хууль тогтоомжийн дагуу хариуцлага тооцож ажиллах;

г) төрийн өмчит хуулийн этгээдийн үндсэн хөрөнгөд хамаарах захиалгат эд хөрөнгийг төвлөрүүлэн хангах асуудлаар санал боловсруулж 2009 оны I улиралд багтаан Засгийн газарт танилцуулах.

11. Энэхүү тогтоолын биелэлтэд хяналт тавьж ажиллахыг Монгол Улсын сайд, Засгийн газрын Хэрэг эрхлэх газрын дарга Б.Долгорт даалгасугай.

**МОНГОЛ УЛСЫН
ЕРӨНХИЙ САЙД** **С.БАЯР**

**МОНГОЛ УЛСЫН САЙД,
ЗАСГИЙН ГАЗРЫН ХЭРЭГ
ЭРХЛЭХ ГАЗРЫН ДАРГА** **Б.ДОЛГОР**

МОНГОЛ УЛСЫН ЗАСГИЙН ГАЗРЫН ТОГТООЛ

2008 оны 12 дугаар сарын 5-ны өдөр

Дугаар 51

Улаанбаатар хот

Хөрөнгө оруулалтын гэрээний тухай

Ашигт малтмалын тухай хуулийн 29.2-ыг үндэслэн Монгол Улсын Засгийн газраас ТОГТООХ нь:

1. Оюутолгой, Тавантолгой ордыг ашиглах зорилгоор гадаад, дотоодын хөрөнгө оруулагчтай хөрөнгө оруулалтын гэрээ байгуулах яриа хэлэлцээ хийхийг Сангийн сайд С.Баярцогт, Эрдэс баялаг, эрчим хүчний сайд Д.Зоригт, Байгаль орчин, аялал жуулчлалын сайд Л.Гансүх нарт үүрэг болгосугай.

2. Сангийн сайд С.Баярцогт, Эрдэс баялаг, эрчим хүчний сайд Д.Зоригт, Байгаль орчин, аялал жуулчлалын сайд Л.Гансүх нарт даалгах нь:

а) хөрөнгө оруулалтын гэрээ байгуулах ажлын хэсэг байгуулж, байнгын удирдлагаар хангаж ажиллуулсугай;

б) хөрөнгө оруулалтын гэрээний яриа хэлэлцээ хийхдээ Ашигт малтмалын тухай хууль, Улсын Их Хурлын 2008 оны 12 дугаар сарын 4-ний өдрийн 40 дүгээр тогтоол болон холбогдох бусад хууль тогтоомжийг мөрдөж ажилласугай;

в) хөрөнгө оруулалтын гэрээ хийх хэлэлцээрийн явц, үр дүнг Монгол Улсын Ерөнхий сайд болон Засгийн газарт 7 хоног тутам танилцуулж байхын хамт гэрээний төслийг 2009 оны 1 дүгээр сарын 20-ны дотор Засгийн газрын хуралдаанд оруулсугай.

3. Хөрөнгө оруулалтын гэрээний хэлэлцээ хийх явцад санал өгөх, дүгнэлт гаргах үүрэг бүхий эрдэмтэн судлаачид болон төрийн бус байгууллагатай зөвлөлдөх хэсэг байгуулж ажиллуулах арга хэмжээ авахыг Эрдэс баялаг, эрчим хүчний сайд Д.Зоригтод даалгасугай.

**МОНГОЛ УЛСЫН
ЕРӨНХИЙ САЙД** **С.БАЯР**

**ЭРДЭС БАЯЛАГ, ЭРЧИМ
ХҮЧНИЙ САЙД** **Д.ЗОРИГТ**

**МОНГОЛ УЛСЫН САЙД,
ЗАСГИЙН ГАЗРЫН ХЭРЭГ
ЭРХЛЭХ ГАЗРЫН ДАРГА** **Б.ДОЛГОР**

МОНГОЛ УЛСЫН ЗАСГИЙН ГАЗРЫН ТОГТООЛ

2008 оны 12 дугаар сарын 17-ны өдөр

Дугаар 58

Улаанбаатар хот

Журам батлах тухай

Монгол Улсыг хөгжүүлэх сангийн тухай хуулийн 6.5, "Монгол Улсыг хөгжүүлэх сангийн хөрөнгийн зарим хэсгийг хүнсний буудайн нөөц хэлбэрээр байршуулах тухай" Улсын Их Хурлын 2008 оны 42 дугаар тогтоолыг үндэслэн Монгол Улсын Засгийн газраас **ТОГТООХ нь:**

1. "Монгол Улсыг хөгжүүлэх санд нөөц хэлбэрээр байршуулах хүнсний буудайг хадгалах байршил, түүнд байршуулах хүнсний буудайн хэмжээг тогтоох, худалдан авах, борлуулах, хадгалах үйл ажиллагааг зохицуулах журам"-ыг 1 дүгээр хавсралт, "Хүнсний буудайг нөөцлөх байршил, түүнд байршуулах хүнсний буудайн хэмжээ"-г 2 дугаар хавсралтын ёсоор тус тус баталсугай.

2. Улсын Их Хурлын 2008 оны 42 дугаар тогтоолоор зөвшөөрөгдсөн хөрөнгөд багтаан 100

мянган тонн хүнсний буудайг нөөцлөх ажлыг зохион байгуулахыг Монгол Улсын Шадар сайд М.Энхболд, Хүнс, хөдөө аж ахуй, хөнгөн үйлдвэрийн сайд Т.Бадамжунай нарт даалгасугай.

3. Энэхүү журмын хэрэгжилтэд хяналт тавьж ажиллахыг Монгол Улсын Шадар сайд М.Энхболд, Сангийн сайд С.Баярцогт, Хүнс, хөдөө аж ахуй, хөнгөн үйлдвэрийн сайд Т.Бадамжунай нарт тус тус үүрэг болгосугай.

МОНГОЛ УЛСЫН ЕРӨНХИЙ САЙД	С.БАЯР
САНГИЙН САЙД	С.БАЯРЦОГТ
ХҮНС, ХӨДӨӨ АЖ АХУЙ, ХӨНГӨН ҮЙЛДВЭРИЙН САЙД	Т.БАДАМЖУНАЙ

Засгийн газрын 2008 оны 58 дугаар тогтоолын 1 дүгээр хавсралт

**МОНГОЛ УЛСЫГ ХӨГЖҮҮЛЭХ САНД НӨӨЦ ХЭЛБЭРЭЭР
БАЙРШУУЛАХ ХҮНСНИЙ БУУДАЙГ ХАДГАЛАХ БАЙРШИЛ,
ТҮҮНД БАЙРШУУЛАХ ХҮНСНИЙ БУУДАЙН ХЭМЖЭЭГ
ТОГТООХ, ХУДАЛДАН АВАХ, БОРЛУУЛАХ, ХАДГАЛАХ
ҮЙЛ АЖИЛЛАГААГ ЗОХИЦУУЛАХ ЖУРАМ**

Нэг. Нийтлэг үндэслэл

1. Монгол Улсыг хөгжүүлэх санд нөөц хэлбэрээр байршуулах хүнсний буудайг хадгалах байршил, түүнд байршуулах хүнсний буудайн хэмжээг тогтоох, худалдан авах, борлуулах, хадгалах үйл ажиллагааг энэхүү журмаар зохицуулна.

2. Нөөц хэлбэрээр байршуулах хүнсний буудайн хэмжээг тогтоох, байршуулах, худалдан авах, борлуулах, хадгалах болон хяналт тавьж байгаа төрийн захиргааны төв байгууллага, өмчийн бүх хэлбэрийн хуулийн этгээд, байгууллага, иргэн үйл ажиллагаандаа энэхүү журмыг мөрдлөг болгоно.

3. Сангийн яам нь Монгол Улсыг хөгжүүлэх сангийн хөрөнгийн зарим хэсгийг хүнсний буудайн

нөөц хэлбэрээр байршуулахдаа Хүнс, хөдөө аж ахуй, хөнгөн үйлдвэрийн яам, Онцгой байдлын ерөнхий газартай нөөцийн буудай хадгалалтын гэрээ байгуулна.

4. Стандартын шаардлага хангасан хүнсний буудайг Тариаланг дэмжих сан, улсын нөөцийн агуулахад нөөцлөн хадгална.

5. Хүнсний буудайг худалдан авах болон борлуулах үйл ажиллагааны зардлыг буудай худалдан авах үнэд шингээж, Монгол Улсыг хөгжүүлэх сангаас зарцуулсан хөрөнгийг бүрэн хэмжээгээр буцаан төвлөрүүлэх зарчим баримтална.

6. Хүнсний буудайг хүлээн авах, хадгалах, хяналт тавих үйл ажиллагаанд "Хүнсний буудай MNS-97-2004" болон холбогдох стандартыг дагаж мөрдөнө.

Хоёр. Хүнсний буудайн нөөц бүрдүүлэх

7. Хүнс, хөдөө аж ахуй, хөнгөн үйлдвэрийн яам, Онцгой байдлын ерөнхий газар нь Засгийн газраас тогтоосон хүнсний буудайн хэмжээг баримтлан Улсын Их Хурлаас баталсан хөрөнгийн дүнд багтаан газар тариалангийн аж ахуйн нэгж, байгууллага, иргэнээс хүнсний буудайг худалдан авах, борлуулах, хадгалахтай холбогдсон үйл ажиллагааг хэрэгжүүлнэ.

8. Хүнсний буудай худалдан авах гэрээ, хүлээлцэх акт, тайлангийн маягтын загварыг Хүнс, хөдөө аж ахуй, хөнгөн үйлдвэрийн сайд, Онцгой байдлын ерөнхий газар, Улсын мэргэжлийн хяналтын газрын даргын хамтарсан тушаалаар батална.

9. Хүнсний буудайн нөөц бүрдүүлэх, борлуулах, хадгалах үйл ажиллагааг Тариаланг дэмжих сан, улсын нөөцийн харьяа салбараар гүйцэтгүүлж зөвхөн хүнсний хэрэгцээнд зориулан гурилын үйлдвэрүүдэд жил бүрийн 2, 3 дугаар улиралд борлуулна.

10. Нөөцийн буудай борлуулсан үнийг Төрийн сан дахь Монгол Улсыг хөгжүүлэх сангийн дансанд төвлөрүүлэн тухайн жилийн намрын ургацаас хүнсний буудайн нөөцийг дахин бүрдүүлэхэд ашиглана.

11. Хүнс, хөдөө аж ахуй, хөнгөн үйлдвэрийн яам, Онцгой байдлын ерөнхий газар нь зах зээл дэх гурилын хэрэгцээ, хангамжийг харгалзан хүнсний буудайг борлуулах, тухайн жилийн ургацаас худалдан авч дахин нөөц бүрдүүлэх талаархи саналаа Засгийн газарт тавьж шийдвэрлүүлнэ.

12. Технологийн шаардлага хангасан агуулах бүхий аж ахуйн нэгжид хүнсний буудайг гэрээгээр хадгалуулж болно.

Гурав. Хүнсний буудайн нөөцийн санхүүжилт

13. Хүнсний буудайг Засгийн газраас тогтоосон хэмжээгээр агуулахад хүлээн авсан дараа Сангийн яам нь Төрийн санд байршуулсан Монгол Улсыг хөгжүүлэх сангийн хөрөнгөөс санхүүжилт хийнэ.

14. Хүнсний буудай нийлүүлж байгаа аж ахуйн нэгж, байгууллага, иргэн улсын стандартын шаардлага хангасан хүнсний буудайг цэвэр жингээр тооцсон тухай тодорхойлолт, мэргэжлийн байгууллагын дүгнэлт, гэрээ, тооцоо нийлсэн баримтыг Хүнс, хөдөө аж ахуй, хөнгөн үйлдвэрийн яам болон Онцгой байдлын ерөнхий газарт ирүүлнэ.

15. Хүнс, хөдөө аж ахуй, хөнгөн үйлдвэрийн яам болон Онцгой байдлын ерөнхий газар нь энэхүү журмын 14-т заасан материалыг хянан үзээд санхүүжилт хийх хүсэлтийг Сангийн яаманд гаргана. Хүсэлтэд аж ахуйн нэгж, байгууллага, иргэний нэр, худалдан авсан буудайн хэмжээ, үнэ, стандартын шаардлага хангасан тухай тодорхойлолт, гэрээ, тооцоо нийлсэн баримтын дугаар бичигдсэн байна.

16. Сангийн яам нь Хүнс, хөдөө аж ахуй, хөнгөн үйлдвэрийн яам, Онцгой байдлын ерөнхий газрын хүсэлт, нэхэмжлэл болон аж ахуйн нэгж, байгууллага, иргэдээс худалдан авсан буудайн баримтыг үндэслэн мөнгийн Монгол Улсыг хөгжүүлэх сангийн данснаас Тариалан эрхлэлтийг дэмжих сан, Онцгой байдлын ерөнхий газрын дансанд шилжүүлнэ.

17. Хүнс, хөдөө аж ахуй, хөнгөн үйлдвэрийн яам (Тариаланг дэмжих сан), Онцгой байдлын ерөнхий газар нь Монгол Улсыг хөгжүүлэх сангаас олгосон хөрөнгийг буудай нийлүүлсэн аж ахуйн нэгж, иргэн, хадгалагч нарт гэрээний гүйцэтгэл, тооцоо нийлсэн баримтыг үндэслэн ажлын 5 өдөрт багтаан олгоно.

18. Нөөцийн буудайг шинжлэх, цэвэрлэх, агуулахад хүргэх зардлыг буудай нийлүүлсэн аж ахуйн нэгж, байгууллага, иргэн хариуцна. Мөн буудайг сэлгэх, хадгалахтай холбогдон гарах зардлыг буудай худалдан авах үнэд оруулан тооцно.

Дөрөв. Хяналт тавих

19. Хүнсний буудай худалдан авах, борлуулах, хадгалах үйл ажиллагаанд мэргэжлийн хяналтын асуудал хариуцсан төрийн захиргааны байгууллага болон Хүнс, хөдөө аж ахуй, хөнгөн үйлдвэрийн яам, Онцгой байдлын ерөнхий газар хуулиар олгогдсон эрх хэмжээний хүрээнд хяналт тавьж ажиллана.

20. Мэргэжлийн хяналтын асуудал хариуцсан төрийн захиргааны байгууллага нь аж ахуйн нэгж, байгууллага, иргэдээс нөөцөд авч байгаа хүнсний буудайн чанарт "Хүнсний буудай- MNS-97-2004" стандартын дагуу шинжилгээ хийж, дүгнэлт гаргана.

21. Хүнс, хөдөө аж ахуй, хөнгөн үйлдвэрийн яам, Онцгой байдлын ерөнхий газар нь өөрийн харьяа салбар, нэгжүүдэд худалдан авч байршуулсан нөөцийн буудай, зарцуулсан хөрөнгийн тайланг нэгтгэн хагас, бүтэн жилээр Сангийн яаманд хүргүүлж энэхүү журмын хэрэгжилтийн явцыг жил бүрийн 6, 12 дугаар сард багтаан Засгийн газарт танилцуулж байна.

Засгийн газрын 2008 оны 58 дугаар
тогтоолын 2 дугаар хавсралт

ХҮНСНИЙ БУУДАЙГ НӨӨЦЛӨХ БАЙРШИЛ, ТҮҮНД БАЙРШУУЛАХ ХҮНСНИЙ БУУДАЙН ХЭМЖЭЭ

**А. Онцгой байдлын ерөнхий газрын улсын нөөцийн салбаруудад
худалдан авах хүнсний буудайн байршил, хэмжээ**

№	Байршил	Тоо хэмжээ (мян.тн)
1	Булган аймаг, Сэлэнгэ сум	1.2
2	Булган аймаг, Хутаг-Өндөр сум	2.2
3	Дархан-Уул аймаг, Хонгор сум	3.2
4	Сэлэнгэ аймаг, Мандал сум	0.8
5	Сэлэнгэ аймаг, Орхонтуул сум	1.4
6	Төв аймаг, Жаргалант сум	1.0
7	Төв аймаг, Цээл сум	1.2
8	Увс аймаг, Баруунтуруун сум	0.2
9	Хэнтий аймаг, Өмнөдэлгэр сум	0.6
10	Дархан-Уул аймаг, элеватор	22.2
Дүн		34.0

**Б. Тариаланг дэмжих санд худалдан авах
хүнсний буудайн байршил, тоо хэмжээ**

№	Байршил	Тоо хэмжээ (мян.тн)
1	Сэлэнгэ аймгийн Сайхан сум, Хөтөл элеватор	24.0
2	Сэлэнгэ аймгийн Сүхбаатар сум, Сэлэнгэ элеватор	40.0
3	Өвөрхангай аймгийн Хархорин сум, Хархорин элеватор	2.0
Дүн		66.0

МОНГОЛ УЛСЫН ЗАСГИЙН ГАЗРЫН ТОГТООЛ

2008 оны 12 дугаар
сарын 24-ний өдөр

Дугаар 64

Улаанбаатар
хот

**Засгийн газрын тохируулагч,
хэрэгжүүлэгч агентлаг
байгуулах тухай**

Засгийн газрын тухай хуулийн 18^д дугаар зүйлийн 1 дэх хэсэг, Засгийн газрын агентлагийн тухай хуулийн 5.1, 6.3-т заасныг болон "Төрийн захиргааны байгууллагын тогтолцоо, бүтцийн

ерөнхий бүдүүвчийг батлах тухай" Улсын Их Хурлын 2008 оны 12 дугаар сарын 19-ний өдрийн 43 дугаар тогтоолыг үндэслэн Монгол Улсын Засгийн газраас **ТОГТООХ** нь:



1. Засгийн газрын тохируулагч болон хэрэгжүүлэгч агентлагуудыг хавсралтын ёсоор байгуулан ажиллуулсугай.

2. Засгийн газрын тохируулагч, хэрэгжүүлэгч агентлагуудын үйл ажиллагааны стратеги, зохион байгуулалтын бүтцийн өөрчлөлтийн хөтөлбөр, зохион байгуулалтын бүтэц, орон тооны дээд хязгаарыг баталж мөрдүүлэхийг Засгийн газрын гишүүдэд үүрэг болгосугай.

3. Засгийн газрын тохируулагч, хэрэгжүүлэгч агентлагууд шинээр болон өөрчлөн байгуулагдсантай холбогдуулан Сэргээгдэх эрчим хүчний үндэсний төв, Эрчим хүчний судалгаа, хөгжлийн төв, Барилга, хот байгуулалт, нийтийн аж ахуйн үндэсний төв, Тээврийн үйлчилгээний төв, Авто замын хяналт, судалгааны төв, Усны хэмнэлтийн төв, Усны институт, Ой, усны хайгуул судалгааны төв, Банкны өр барагдуулах газар, Сорьцын улсын хяналтын алба, Цөм сүргийн үржлийн төвийг тус тус татан буулгаж, Сэргээгдэх эрчим хүчний үндэсний төв, Эрчим хүчний судалгаа, хөгжлийн төв, Барилга, хот байгуулалт, нийтийн аж ахуйн үндэсний төв, Тээврийн үйлчилгээний төв, Авто замын хяналт, судалгааны төв, Усны хэмнэлтийн төв, Усны институт, Ой, усны хайгуул судалгааны төвийн чиг үүргүүдийг шинээр байгуулагдсан холбогдох агентлагуудад, Банкны өр барагдуулах газрын чиг үүргийг Шүүхийн шийдвэр гүйцэтгэх ерөнхий газарт, Сорьцын улсын хяналтын албаны чиг үүргийг Стандартчилал, хэмжил зүйн газарт, Цөм сүргийн үржлийн төвийн чиг үүргийг орон нутгийн захиргааны байгууллагад тус тус шилжүүлсүгэй.

4. Аж ахуйн тооцооны үндсэн дээр ажиллаж, үйл ажиллагааныхаа орлогоос санхүүжиж байсан Засгийн газрын агентлагуудыг Засгийн газрын агентлагийн эрх зүйн байдлын тухай хуулийн дагуу улсын төсвөөс санхүүжүүлэх зарчимд шилжүүлэн, орлогыг улсын төсөвт бүрэн төвлөрүүлж ажиллуулах зохион байгуулалтын арга хэмжээ авахыг Засгийн газрын гишүүдэд даалгасугай.

5. Энэ тогтоол гарсантай холбогдуулан "Засгийн газрын тохируулагч, хэрэгжүүлэгч агентлаг байгуулах тухай" Засгийн газрын 2002 оны 8 дугаар сарын 14-ний өдрийн 162 дугаар тогтоол, "Тогтоолд өөрчлөлт оруулах тухай" Засгийн газрын 2003 оны 9 дүгээр сарын 8-ны өдрийн 198 дугаар тогтоол, "Тогтоолын хавсралтад нэмэлт оруулах тухай" Засгийн газрын 2003 оны 12 дугаар сарын 24-ний өдрийн 270 дугаар тогтоол, "Тогтоолын хавсралтад өөрчлөлт оруулах тухай" Засгийн газрын 2004 оны 1 дүгээр сарын 7-ны өдрийн 1 дүгээр тогтоол, "Агентлаг байгуулах тухай" Засгийн газрын 2004 оны

10 дугаар сарын 20-ны өдрийн 205 дугаар тогтоол, "Засгийн газрын агентлаг байгуулах тухай" Засгийн газрын 2004 оны 10 дугаар сарын 20-ны өдрийн 207 дугаар тогтоол, "Шударга бус өрсөлдөөнийг хянан зохицуулах газрыг байгуулах тухай" Засгийн газрын 2004 оны 11 дүгээр сарын 17-ны өдрийн 222 дугаар тогтоол, "Засгийн газрын агентлаг байгуулах тухай" Засгийн газрын 2004 оны 12 дугаар сарын 29-ний өдрийн 249 дүгээр тогтоол, "Усны хэрэг зрхлэх газар байгуулах тухай" Засгийн газрын 2005 оны 3 дугаар сарын 9-ний өдрийн 46 дугаар тогтоол, "Хууль хэрэгжүүлэх зарим арга хэмжээний тухай" Засгийн газрын 2005 оны 3 дугаар сарын 9-ний өдрийн 48 дугаар тогтоолын 1 дүгээр зүйл, "Агентлаг байгуулах тухай" Засгийн газрын 2006 оны 8 дугаар сарын 23-ны өдрийн 201 дүгээр тогтоол, "Тогтоолын хавсралтад нэмэлт оруулах тухай" Засгийн газрын 2008 оны 6 дугаар сарын 2-ны өдрийн 212 дугаар тогтоол, "Цөмийн энергийн талаар авах зарим арга хэмжээний тухай" Засгийн газрын 2008 оны 6 дугаар сарын 25-ны өдрийн 263 дугаар тогтоолын 1 дүгээр зүйл, "Усны үндэсний хороо болон Ой, усны хайгуул судалгааны төвийн талаар авах зарим арга хэмжээний тухай" Засгийн газрын 2003 оны 1 дүгээр сарын 8-ны өдрийн 4 дүгээр тогтоол, "Зам, тээвэр, аялал жуулчлалын яамны зохион байгуулалтын бүтэц, үйл ажиллагааны стратеги, зохион байгуулалтын бүтцийн өөрчлөлтийн хөтөлбөр батлах тухай" Засгийн газрын 2004 оны 10 дугаар сарын 8-ны өдрийн 202 дугаар тогтоол, "Түлш, эрчим хүчний яамны зохион байгуулалтын бүтэц, үйл ажиллагааны стратеги, зохион байгуулалтын бүтцийн өөрчлөлтийн хөтөлбөр батлах тухай" Засгийн газрын 2004 оны 10 дугаар сарын 8-ны өдрийн 203 дугаар тогтоол, "Зарим яамдын зохион байгуулалтын бүтэц, үйл ажиллагааны стратеги, бүтцийн өөрчлөлтийн хөтөлбөр зөвшөөрөх, бүтэц батлах тухай" Засгийн газрын 2004 оны 12 дугаар сарын 6-ны өдрийн 236 дугаар тогтоол, "Сэргээгдэх эрчим хүчний үндэсний төв байгуулах тухай" Засгийн газрын 2005 оны 7 дугаар сарын 8-ны өдрийн 160 дугаар тогтоол, "Төв байгуулах тухай" Засгийн газрын 2006 оны 3 дугаар сарын 7-ны өдрийн 37 дугаар тогтоол, "Малын удмын сангийн үндэсний төв, цөм сүргийн үржлийн төв байгуулах тухай" Засгийн газрын 2006 оны 7 дугаар сарын 19-ний өдрийн 172 дугаар тогтоолын 2, 3, 4 дүгээр зүйлийг тус тус хүчингүй болсонд тооцсугай.

МОНГОЛ УЛСЫН ЕРӨНХИЙ САЙД	С.БАЯР
МОНГОЛ УЛСЫН САЙД, ЗАСГИЙН ГАЗРЫН ХЭРЭГ ЭРХЛЭХ ГАЗРЫН ДАРГА	Б.ДОЛГОР

ЗАСГИЙН ГАЗРЫН ТОХИРУУЛАГЧ БОЛОН ХЭРЭГЖҮҮЛЭГЧ АГЕНТЛАГИЙН ЖАГСААЛТ

Эрхлэх асуудлын хүрээ, харьяалал	Засгийн газрын тохируулагч агентлаг	Засгийн газрын хэрэгжүүлэгч агентлаг
Ерөнхий сайдын эрхлэх ажлын үндсэн хүрээнд	-Тэгнгуулын ерөнхий газар -Үндэсний хөгжил, шинэтгэлийн хороо -Цөмийн энергийн газар -Төрийн өмчийн хороо -Мэдээлэл, шуудан, харилцаа, холбоо, технологийн газар	
Тэргүүн шадар сайдын эрхлэх асуудлын хүрээнд	-Шударга өрсөлдөөн, хэрэглэгчийн төлөө газар -Стандартчилал, хэмжил зүйн газар	-Оюуны өмчийн газар -Улсын бүртгэлийн ерөнхий газар
Шадар сайдын эрхлэх асуудлын хүрээнд	-Мэргэжлийн хяналтын ерөнхий газар -Онцгой байдлын ерөнхий газар	-Хүүхдийн төлөө газар
Монгол Улсын сайд, Засгийн газрын Хэрэг эрхлэх газрын даргын эрхлэх асуудлын хүрээнд		-Удирдлагын академи -Төр, засгийн үйлчилгээ, аж ахуйг эрхлэх газар
Гадаад харилцааны сайдын эрхлэх асуудлын хүрээнд		-Дипломат байгууллагын үйлчилгээ, аж ахуйн Газар -Гадаадын хөрөнгө оруулалтын газар
Сангийн сайдын эрхлэх асуудлын хүрээнд		-Гаалийн ерөнхий газар -Татварын ерөнхий газар
Хууль зүй, дотоод хэргийн сайдын эрхлэх асуудлын хүрээнд	-Цагдаагийн ерөнхий газар -Хил хамгаалах ерөнхий газар	-Архивын ерөнхий газар -Шүүхийн шийдвэр гүйцэтгэх ерөнхий газар -Гадаадын иргэн, харьяатын асуудал эрхлэх газар



<p>Байгаль орчин, аялал жуулчлалын сайдын эрхлэх асуудлын хүрээнд</p> <p>Батлан хамгаалахын сайдын эрхлэх асуудлын хүрээнд</p>	<p>-Ойн газар -Усны газар -Цаг уур, орны шинжилгээний газар</p> <p>-Зэвсэгт хүчний жанжин штаб</p>
<p>Боловсрол, соёл, шинжлэх ухааны сайдын эрхлэх асуудлын хүрээнд</p>	<p>-Соёл, урлагийн хороо</p>
<p>Зам, тээвэр, барилга, хот байгуулалтын сайдын эрхлэх асуудлын хүрээнд</p>	<p>-Иргэний нисэхийн ерөнхий газар -Төмөр замын газар -Авто тээврийн газар -Авто замын газар -Газрын харилцаа, барилга, геодези, зураг зүйн газар</p>
<p>Нийгмийн хамгаалал, хөдөлмөрийн сайдын эрхлэх асуудлын хүрээнд</p> <p>Хүнс, хөдөө аж ахуй, хөнгөн үйлдвэрийн сайдын эрхлэх асуудлын хүрээнд</p>	<p>-Нийгмийн даатгалын ерөнхий газар -Хөдөлмөр, халамжийн үйлчилгээний газар</p> <p>-Жижиг, дунд үйлдвэрийн газар -Мал эмнэлэг, үржлийн газар</p>
<p>Эрдэс баялаг, эрчим хүчний сайдын эрхлэх асуудлын хүрээнд</p> <p>Эрүүл мэндийн сайдын эрхлэх асуудлын хүрээнд</p>	<p>-Ашигт малтмалын газар -Газрын тосны газар -Эрчим хүчний газар</p> <p>-Биеийн тамир, спортын газар -Эрүүл мэндийн газар</p>

Монгол Улсын Их Хурлын Тамгын газраас гаргав
Хаяг: <<Төрийн мэдээлэл>> эмхтгэлийн зөвлөл

Улсын Их Хурлын Тамгын газрын
Хэвлэх хэсэгт хэвлэв.

Улаанбаатар- 12
Төрийн ордон

☎ 262420
Индекс: 14003

☎ 329487

Хэвлэлийн хуудас 2/5